







John Carter Brown.





Harrison 55.

Comp.

18th ed 18th issue

In libris Congreg. miss. Romae


RELATION

DE CE QVI S'EST PASSE EN
LA NOVVELLE FRANCE
EN L'ANNEE 1632.

Enuoyée

AV R. P. BARTH. IACQVINOT
Prouincial de la Compagnie de
IESVS en la prouince de
France.

*Par le P. Paul le Jeune de la mesme Compa-
gnie, Supérieur de la residence de Kebec.*




A PARIS,

Chez SEBASTIEN CRAMOISY,
rue S. Iacques, aux Cicognes.

M. DC. XXXIV.

AVEC PRIVILEGE DV ROY.





RELATION

DE CE QUI S'EST PASSE' EN LA
NOUVELLE FRANCE
EN L'ANNEE 1633.



MON R. PERE;

Les lettres qu'on enuoie en ces païs
cy, sont comme des fructs bien
rars & bien nouveaux: on les reçoit
avec contentement, on les regarde
avec plaisir: on les sauoure comme
des fructs du Paradis terrestre. Il y
auoit vn an que V. R. ne nous auoit
parlé; ce peu de mots qu'il luy a pleu
nous coucher sur le papier, nous sem-

A ij

blent des paroles de l'autre monde, aussi sont elles pour moy, ie les prèds cōme des paroles du ciel. C'est assez dict pour tesmoigner les sentimens qu'a eu mon ame à la veüe de ses lettres. Et afin que la joye possedast entieremēt nostre cœur, il ne falloit point d'autres messagers pour les apporter, que ceux qui sont venus. On estoit icy en doubte si Monsieur de Champlain, ou quelque autre de la part de Messieurs de la Compagnie de la Nouvelle France, ou bien si le sieur Guillaume de Caen deuoit venir, comme il en auoit l'an passé donné parole publiquement dans nostre vaisseau au sortir de France. Chacun defendoit son party, & produisoit ses raisons probables avec respect & modestie, quand tout d vn coup Monsieur de Champlain, avec les ordres de Monseigneur le Cardinal est venu terminer le differend en faueur de la

Compagnie de la Nouuelle France, ce iour nous a esté l'un des bōs iours de l'année, nous sommes entrez dās de fortes esperances qu'en fin apres tāt de bourrasques Dieu vouloit regarder nos pauvres Sauvages de l'œil de sa bonté & de sa misericorde; puis qu'il donnoit cœur à ces Messieurs de poursuiure leur pointe malgré les contrastes que les demons, l'enuie, & l'auarice des hommes leur ont suscitez. Ie ne sçay comme cela se fait, mais ie sçay bien que puis qu'ils s'interessent en la gloire de Dieu, en la publication de l'Euangile, en la conuersion des ames, nous ressentons ie ne sçay quel interest d'affection dās leurs affaires, en telle sorte que si nos souhaits auoyent lieu, ils recueilleroient plus en vn mois, qu'ils n'ont perdu en tant d'années que leurs desseins ont esté trauersez. Aussi sont ils nos Peres, puis qu'ils nourrissent icy

vne partie de nous autres, & nous
departent à tous leur affection abô-
damment. I'espere que dans quel-
ques années ils verront des fruiçts du
Ciel, & de la terre sortir du grain
qu'ils ont semé avec tant de peine.
C'est la coniecture qu'on pourra ti-
rer des petites remarques que ie vay
brièvement tracer.

Et afin d'euter la confusion, ie
fuiuray l'ordre du temps : Mais au
prealable il faut que ie die que nous
auons pris vn singulier plaisir dans
les deportemens de nos François hy-
uernans. Il n'en faut point mentir,
i'eus quelque apprehension dans la
trauerse que le libertinage ne passast
la mer avec nous : mais le bon exem-
ple des chefs qui commandoyét icy,
l'éloignement des débauches, le pe-
tit trauail que nous auons pris dans
les predications, & adiministration
des sacrements, les ont retenus telle-

ment dans le debvoir, qu'encor bien que nous eussions des personnes de deux partis bien differents, neantmoins il sembloit que l'amour & le respect commandoit pour l'ordinaire & aux vns & aux autres. Plusieurs se sont confessez generalement de toute leur vie. Ceux qui n'auoyent quasi iamais parlé du ieusne que par risée, l'ont estroittement gardé, se rendans obeïssans à leur mere l'Eglise Chrestienne & Catholique.

Mais venons au depart des vaisseaux de l'an passé, pour suiure les mois qui se sont escoulez depuis ce tēps là que nous auisames le Pere de Nouë & moy, qu'il falloit chercher les moyens de s'addonner à l'estude de la langue, sans la cognoissance de laquelle on ne peut secourir les Sauvages. Je quittay donc tout autre soing, & commençay à fueilleter vn petit Dictionnaire escrit à la main,

qu'on m'auoit donné en France; mais tout rempli de fautes.

Le 12 d'Octobre voyant que i'auançois fort peu, apprenant avec beaucoup de peine des mots décou-
fus, ie m'en allay visiter les cabanes
des Sauvages à desseing d'y aller sou-
uent, & me faire l'oreille à leur lan-
gue. Ils estoient cabanez à plus d'une
grande lieuë loing de nostre maison,
& de peur de m'égarer dans les bois
ie pris vn long destour sur le bord du
grand fleuve de Saint Laurens. O
que de peine à trencher les roches
de la pointe aux diamans! C'est vn
lieu ainsi appellé de nos François,
pource qu'on y trouue quantité de
petits diamants assez beaux. Ces che-
mins sont affreux: i'allois des pieds &
des mains, avec belle peur de me lais-
ser tóber. Je passay par des endroits
si estroits, que la marée montant, &
m'empeschant de poursuiure mon

chemin, ie ne pouuois retourner en arriere, tant le passage me sembloit dangereux. Je grimpay au dessus des rochers, & m'agraffant à vne branche qui arrestoit vn arbre abbattu, cet arbre s'en vint rouler vers moy avec vne telle impetuosité, que si ie n'eusse esquivé son coup, il m'eut tout brisé, & ietté dans la riuere.

Arriué que ie fus aux cabanes des Sauvages, ie vey leur secherie d'anguilles. C'est les femmes qui exercent ce mestier. Elles vuidét ce poisson, le lauent fort bien, l'ouurant nô par le ventre, mais par le dos, puis le pendent à la fumée, l'ayant faict au prealable esgoutter sur des perches hors de leurs cabanes. Elles le taillent en plusieurs endroits afin que la fumée le desseche plus aisement. La quantité d'anguilles qu'ils prennent en ce temps là est incroyable: ie ne voyois autre chose dedans &

dehors leurs cabanes. Les François & eux en mangēt incessamment pendant ce temps là, & en gardent quantité pour les iours qu'on ne mange point de chair, ientens les François; car les Sauvages n'ont point d'autres mets pour l'ordinaire que celuy-là, iusques à ce que les neges soient grandes pour la chasse del'Orignac. Côme i'allois de cabane en cabane, vn petit garçon aagé d'environ douze ans s'en vint droict à moy. Ie l'auois caressé l'ayant trouué quelques iours au parauant en quelque endroit, me semblât fort posé & modeste. M'ayant recogneu, il me dict *Aniaachtam* *achtam*: Mon frere, viens, viens. Il me mene en la cabane de ses parens: i'y trouuay vne vieille femme qui estoit sa grád' mere, il luy dit deux ou trois mots que ie n'entendis pas; & cette bonne vieille me presenta quatre anguilles boucanées. Ie n'osay les refu-

fer, de peur de la facher. Je m'assis à platte terre auprès de son petit fils: ie tiray vn morceau de pain que i'auois porté avec moy pour mon dîner, i'en donnay à ce petit garçon, à sa grand' mere, & à sa mere qui survint. Ils me firent rostir vne anguille avec vne petite broche de bois qu'ils picquent en terre auprès du feu, puis ils me la presenterent sur vn petit morceau d'escorce: ie la mangeay avec cet enfant, auquel ie demanday de l'eau: il m'en alla querir dans vne escuelle ou plat fait d'escorce. Si tost que i'eus beu, tous ceux qui estoient dans la cabane beurent apres moy. Pour seruiette ce petit garçon ayant manié cette anguille cuite qui estoit fort grasse, il se seruoit de ses cheveux, les autres frotent leurs mains à leurs chiens: cette bonne vieille voyant que ie cherchois où essuier les miennes, me donna de la poudre de

bois sec & pourry, c'est dequoy les meres nettoient leurs petits enfans, ils n'ont point d'autre linge. Apres que i'eu dîné, cette bonne femme me fit vne harangue, me donna encore de l'anguille: elle me sembloit recômander son fils, mais ie ne l'entendois pas. Je tiray mon papier, & luy dis le mieux que ie pû que son fils me vint voir, & qu'il m'apportât les anguilles qu'elles m'auoyent donné, ne les pouuât apporter avec moy pour la difficulté du chemin, lui promettant quelque chose pour sa peine. Je ne sçay s'ils entendirent mon baragoin, mais ie ne l'ay point veu depuis. Estant de retour au logis, & racontant au Pere de Nouë la difficulté du chemin, il me dit pour me consoler, qu'allant aux Hurons on rencontroit quarante endroits plus difficiles que celuy dont ie luy parlois. Dieu soit beny de tout. Si nos

Peres qui iront en ces pais là, ont de la peine, Dieu les sçaura fort bien recompenser. Voyant donc que ie perdois beaucoup de temps en ces allées & venues aux cabanes, ie cherchay vn autre moyē de tirer quelque chose de la langue, dont ie parleray tantost.

Le 13 du mesme mois d'Octobre le Sauvage nommé Manitougache, surnommé des François La Nasse, nous vint voir avec quantité d'autres, qui nous firent depositaires & gardiens de leurs sacs & richesses. Je demanday à l'un d'eux son nom, il baissa la teste sans rien dire: vn François le demanda à vn autre, luy disant *Khiga ichenicasson?* comment t'appelles tu? Il respondit, *namanikisteriten*, ie n'en sçay rien. l'ay depuis appris qu'ils ne veulent point dire leur nom deuant les autres, ie ne sçay pourquoy. Si neâtmoins vous demandez à quel

qu'un comme un autre s'appelle, il vous le dira librement, mais il ne dira pas son nom. Il est vray que ie l'ay faict dire à quelques enfans lesquels me demandans le mien, & voyans que ie le disois librement, ils me disoyent aussi le leur.

Le 24^e estant allé dire la Messe à l'habitation de nos François, un Capitaine des Sauvages vint voir le sieur Emery de Caen, & luy dict que les Algonquains estés allez à la guerre contre les Hiroquois un de leurs hommes auoit esté tué, & l'autre pris prisonnier. Ce qui auoit tellement espouuanté les Montagnais, qu'ils s'en reuenoyent tous de la chasse du castor, & de l'ours, pour se cabaner pres du fort, crainte d'estre surpris de leurs ennemis. Ils se vouloyent rassembler pour estre plus forts: mais ils craignoient la faim en quittant leur chasse. Ils demanderent donc

France, en l'année 1633.

15

si on ne les secoureroit pas de viures au cas qu'ils demeurassent ensemble. La responce fut qu'on ne vouloit rien donner à credit cette année là; ce à quoy ils s'attendoient. On meracôta vne generosité de ce capitaine, estant enuoie pour espion vers les Hiroquois, il rencontra l'espion des ennemis: se voians teste à teste, l'Hiroquois se croiant plus fort que le montagnais, lui dit, Ne faisôs point tuer nos gens; mais luitons ensemble, & voions qui pourra emporter son compagnon. La proposition acceptée, ce capitaine qui pour lors estoit espion des Montagnais, fatigua si fort son homme, que l'ayant terrassé, il le lia, le chargea sur son dos comme vn fagot, & l'emporta vers ses gens. Voilà ce qu'on me dict de luy.

Le mesme iour le Sauvage Manitougache, autrement La Nasse (c'est celuy dont i'escrui à V. R. l'an pas-

fé, qu'il se vouloit venir cabaner auprès de nous, comme il a fait depuis) retournant de la chasse aux ours, s'en vint souper & coucher chez nous. Ayant bien mangé, il commence en riant à frapper doucement son ventre tout nud, disant, *taponé nikissoun*, en verité ie suis saoul. voilà comme ils remercient leurs hostes de la bonne chere qu'on leur a faict: quand ils disent *nikissoun*, ie suis saoul, c'est à dire qu'on les a bien traittez. Il portoit avec soy vn fort grand bouclier fort long & fort large: il me couuroit tout le corps aisemét, & m'alloit depuis les piés iusques à la poictrine: ils le releuēt & s'en couurent entieremét, il estoit fait d'une seule piece de bois de cedre fort leger: ie ne scay comme ils peuuent doler vne si grande & si large planche avec leurs couteaux: il estoit vn petit plié ou courbé pour mieux couvrir le corps, & afin que

les

les coups de fleches ou de masses venans à le fendre, n'emportassent la piece, il l'auoit cousu hault & bas avec de la corde faite de peau : ils ne portent point ces boucliers au bras, ils passent la corde qui les soustient sur l'espaule droicte, abriant le costé gauche : & quand ils ont tiré leur coup, ils ne font que retirer le costé droict pour se mettre à couuert.

Je diray icy que les Sauuageais aimēt fort la sagamité, le mot de Sagamiteou en leur langue signifie proprement de l'eau, ou du broüet chaud : maintenant ils estendent sa signification à toute sorte de potage, de bouillie, & choses semblables. La sagamité qu'ils aiment beaucoup, est faite de farine de bled d'Inde : au défaut de cette farine nous leur en auōs quelquefois donné de la nostre de France, laquelle estant bouillie avec de l'eau, ne fait que de la colle. Ils ne

laissent pas de la manger avec appetit, notamment si on y met vn peu de pimi, c'est à dire d'huile, c'est leur sucre, ils en mettent dans les fraises & framboises quand ils en mangent, à ce qu'on m'a dict: & leurs plus grâds festins sont de graisse, ou d'huile. Ils mordent par fois dans vn morceau de graisse blâche figée comme nous mordrions dans vne pomme: voila leur bonne chere. On m'a dict encor qu'auant qu'on leur apportât des chaudieres de France, ils faisoient cuire leur chair dans des plats d'escorce, qu'ils appellent *ouragana*. Je m'estonnois comme ils pouuoient faire cela, car il n'y a rien si aisé à bruler que cette escorce. On me respôdit qu'ils mettoient leur chair & de l'eau dans ces plats, puis qu'ils mettoyēt cinq ou six pierres dans le feu; & quand l'vne estoit toute bruslante, ils la iettoient dans ce beau pota-

ge, & en la retirant pour la remettre au feu, ils en mettoyēt vne autre touterouge en sa place, & ainsi continuoient ils iusques à ce que leur viande fût cuite. Pierre le Sauvage, dont ie parleray cy apres, m'a asseuré que quelques-vns ayant perdu ou rompu leur chaudiere, se seruoient encor de cette ancienne coustume, & que la chair n'estoit point si long temps à cuire qu'on s'imagineroit bien.

Le 27 d'Octobre veille de sainct Simon & sainct Iude nous vismes vne eclipse de lune, qui me confirma dans la remarque que ie fis l'an passé que vous auiez en France le iour six heures & vn peu dauantage, plustost que no⁹: Car l'Almanach disoit que cette eclipse deuoit arriuer en France sur la minuiet, & nous la vîmes sur les six heures du soir; dont ie conclus que la difference du commencement de nos iours & de nos nuiets

est de six heures : si bien que maintenant vous estes dans la profondeur de la nuit au temps que j'escriis cecy sur les six heures du soir.

Le 28^e quelques chasseurs François retournans des isles qui sont dás le grand fleuve S. Laurens nous dirét qu'il y auoit du gibier à foison, des outardes, des oyes, des canards, des farcelles, & autres oiseaux. Ils nous asscuerent encore qu'il y auoit des pommes dans ces isles, fort douces, mais fort petites, & qu'ils auoyent mangé des prunes qui ne cederoyent point à nos abricots de France si ces arbres estoyent cultiuez. Les Sauvages gastent tout, car rencontrans vn arbre fructier, ils l'abbattent pour auoir le fruit.

Le 31. vn Sauvage surnommé Brehaut pource qu'il parloit fort haut, reuenant de la chasse demáda le couuert chez nous pour vne nuit, & à

souper par consequent. On luy donna des pois, & à ses deux enfans qui l'accompagnoient : il mangeoit avec si grand appetit, que pour exploitter dauantage il quitta vne cueiller d'estain qu'on luy auoit présentée, & prit la grande cueiller du pot, s'en seruant pour manger : Et pource que le plat n'estoit pas assez profond il puioit dans la marmite, de laquelle il se seruoit pour écuelle, sans garder autre ciuilité que celle que son grand appetit luy fournissoit. Je le laissay faire quelque temps : Apres qu'il eut bien mangé, il s'en va prendre de l'eau avec la mesme cueiller du pot, beuuant cela avec plaisir, & reiettant son reste dans le seau. voila toute l'honnesteté qu'ils sçauent.

I'en ay veu quantité d'autres chercheurs quelque chose pour puiser de l'eau, prendre vn petit poesson, dont le deffous est comme celuy d'une

marmite, & boire brauement avec cela, & avec autant de contentement qu'on boiroit en Frâce d'un vin fort excellent dans un verre de crystal: les vaisseaux les plus gras leur sot les plus agreables, pource qu'il n'y a rien qu'ils aiment tant que la graisse, ils boient chaud ordinairement, & mangent à terre: ceux qui maintenant nous cognoissent ne font plus ces grosses inciuites deuant nous.

Le premier iour de Nouembre feste de tous les Saints, aiant appris qu'un pauvre miserable Sauuage mangé d'un chancre ou des écrouelles, estoit dās vne meschante cabane delà le grand fleuve de S. Laurens, abandonné de tout le monde, horsmis de sa fēme qui l'assistoit le mieux qu'elle pouuoit, nous fismes ce que nous ueûmes pour le faire apporter près de nostre maison, afin de le pouuoir secourir selon le corps & selon l'ame:

le Pere de Nouë & nostre Frere le furent voir, ils en eurent grande compassion. Je priay nostre truchement François d'induire les Sauvages à nous l'apporter: car nous ne pouuions l'aller querir; il en parla à l'un d'eux en ma presence, qui demanda ce qu'on luy donneroit, on luy dit qu'on luy donneroit à manger, ie luy fis dire qu'il estoit grandement ingrat, que cet homme estoit de sa nation, & que nous qui n'en estions pas, le vouliôs secourir, & cependant qu'il luy refusoit ce peu d'assistance. A cela point d'autre responce, sinon qu'il s'en alloit bien-tost à la chasse, & qu'il n'auoit pas le loisir de mener là son canot.

J'ay remarqué que les Sauvages font tres-peu d'estat d'un homme de la santé duquel ils desesperent, voire mesme ils les tuënt par fois, où les laissent dās les bois pour s'en deffaire,

ou pour ne les voir languir.

Le 5. du mesme mois de Nouembre, vn grand ieune Sauuage s'en vint chez nous retournant de la chasse aux castors, criant qu'il mouroit de faim, il apportoit quantité de racines, entr'autres force oignons de martagons rouges, dont il y a icy tres-grand nombre, nous luy donnasmes quelque chose, & goustasmes de ces oignons, ils sont tres-bons à manger, il n'y fit point d'autre faulce que de les faire bouillir dās l'eau sans sel, car les Sauuages n'en mangent point, quoy que maintenant ils s'y accoustument fort bien.

Le huietiefme Manitougache sur-nommé la Nasse, & toute sa famille composée de deux ou trois menages, se vindrent cabaner auprès de nostre mailon, ils nous dirent que deux ou trois cabanes de Sauuages auoiēt esté deuorées par de grands animaux in-

cognus, qu'ils croioient que c'étoient des Diables, & que les Montagnais ayant peur, ne vouloient point aller à la chasse du costé du Cap de Tourmente, & de Tadoussac: ces môstres ayans paru de ce costé là, on soupçonna par apres que les Sauvages auoient fait courir ce bruit pour tirer del'autre costé de la riuere.

Le 9. ie m'en allay voir ces nouveaux hostes; comme i'estois dans leur cabane, i'entendois chanter deux hommes sans sçauoir où ils estoient, ie regarde dans toute la cabane, ie ne les voy point, & cependât ils estoient tout au milieu, renfermés comme dans vn four, où ils se mettent pour se faire suer: Ils dressent vn petit tabernacle fort bas, entouré d'écorces, & tout couuert de leurs robbes de peaux: ils font chauffer cinq ou six cailloux qu'ils mettent dans ce four où ils entrent tous nuds,

ils chantent là dedans incessamment, frappans doucement les costez de ces estuues. Je les veis sortir tous mouïllez de leur sueur, voila la meilleure de leurs medecines.

Le 12. de Nouembre, l'hyuer fit ses approches, commençant à nous assieger de ses glaces. Ayant esté fort long temps ce iour là dans vne grande cabane de Sauvages, où il y auoit plusieurs hommes, femmes, enfans de toutes façons, ie remarquay leur admirable patience, s'il y auoit tant de familles ensemble en nostre France, ce ne feroiét que disputes, que querelles, & qu'iniures, les meres ne s'impatientent point apres leurs enfans, ils ne sçauent que c'est que de iurer, tout leur ferment consiste en ce mot *taponé*, en verité, point de ialousie les vns enuers les autres, ils s'entraident & secourent grandement, pource qu'ils esperent le reciproque,

cet espoir manquant, ils ne tiennent compte de qui que ce soit.

Tout ainsi qu'un homme en Europe se compose & s'habille honnestement quand il veut aller en quelque honneste maison, de mesme les Sauvages se font peindre la face quand ils font quelques visites. Le fils de Manitougache voulant aller à l'habitation, ie vy sa mere qui le graissoit & le peignoit de rouge, elle en fit autant à son mary : ils trouuent cela si agreable, que les petits enfans ne pensent pas estre beaux, s'ils ne sont barboüillez : i'en voiois vn qui frottoit ses doigts sur vne hache roüillée, puis se faisoit des rayes au visage avec cette roüillure, ie fis vne petite croix avec vn peu d'encre sur le frond d'un petit garçon, il se tenoit bien braue, & les autres trouuoient cela fort beau. O que le iugement des hommes est foible ! les vns logét la beauté

où les autres ne voient que la laideur. Les dents les plus belles en France sont les plus blanches, aux Isles des Maldives la blancheur des dents est vne difformité, ils se les rougissent pour estre belles: & dans la Cochinchine, si i'ay bonne memoire, ils les teignent en noir. Voyez qui a raison.

Le 13. Manitougache nostre hôte & voisin nous vint dire qu'on auoit veu quantité d'Hiroquois qui auoient paru iusques auprès de Kebec. Tous les Môtagnais trembloient de peur. Celuy-cy nous demanda si sa femme & ses enfans ne pourroient pas bien venir coucher chez nous, nous luy respondismes que luy & ses fils seroient les tres-bien venus, mais que les filles & femmes ne couchoient point dans nos maisons, voire mesme qu'elles n'y entroient point en France, & qu'aussi-tost que nous serions fermez, que la porte ne leur seroit

plus ouuerte: il enuoya donc tout son train, tous les ieunes gens aux cabanes voisines de Kebec, où l'on disoit que l'on enuoyeroit quelques harquebusiers pour les garder: Pour luy estant inuité du Capitaine des Sauuages de prendre sa cabane iusques à ce que l'effroy fut passé, il fit responce que s'il deuoit mourir, qu'il vouloit mourir aupres de nous, & ainsi ayant mis ses gens en assurance, il nous reuint trouuer.

Ce mesme iour Pierre Pastedechouan nous vint voir pour demeurer avec nous. Je ne puis obmettre icy vn trait fort particulier de l'admirable bonté & prouidence de Dieu en nostre endroit. Ce ieune homme a esté conduit en France en son bas âge par les RR. Peres Recolets, il a esté baptisé à Angers, Monsieur le Prince de Guimenée estoit sô parrain, il parle fort bié François, & fort bon Sau-

uage, ayant esté ramené en son pays on le remit entre les mains de ses freres pour reprendre les idées de sa langue qu'il auoit presque oubliées : ce pauvre milerable est deuenu barbare comme les autres, & a tousiours continué dans ses barbaries pendant que les Anglois ont icy seiourné. Sçachant le retour des François, il vint voir le sieur Emery de Caën à Tadoussac, qui l'inuita de monter à Kebec, ce qu'il fit. Il le vouloit prendre pour son truchement, le faisant manger à sa table, luy témoignant vn fort bon visage. Moy cependant comme ie desirois grandement d'entrer dans la cognoissance de la langue, & voyant que ie n'auançois rié faute de maistre, ie deliberay de m'adresser à Dieu, esperant que nous aurions ce ieune homme pour quelque temps : nous nous mismes tous à solliciter cette affaire auprès de nostre Seigneur, ie fen-

tois vn si grand desir, ioinct avec vne si grande confiâce, qu'il me sembloit que nous l'auions desia contre toutes les apparences humaines : car comme on se vouloit seruir de luy au fort, on le traittoit fauorablement, veu d'ailleurs que ne respirant que la liberté, il abhorroit plustost nostre maison, qu'il ne l'aimoit. Dieu est plus fort que tous les hommes, il n'appartient qu'à luy de tirer le bié du mal. Ce pauvre ieune homme estant trop à son aise ne s'y peut tenir, il mescontente le sieur de Caën vne & deux fois, il est disgracié, & remis en faueur, cependant ie sollicite le sieur de Caën de nous l'enuoyer au cas qu'il ne se pût accommoder au fort, qu'il nous obligeroit, & feroit du bien à ce pauvre abandonné, luy qui nous faisoit l'honneur que de nous aimer, s'y accorde aisément. Or ce pauvre garçon se voiant decheu de l'amitié du sieur de

Caën, se iette du costé du sieur du Plessis, c'estoit tomber pour luy de fièvre en chaud mal: car le sieur du Plessis cognoissant ses fripponneries, & desirant qu'il demeurast avec nous, le rebuta, luy promettant son amitié au cas qu'il voulust passer quelques mois en nostre maison pour se remettre dans les devoirs d'un bon Chretien, Monsieur de Caën luy témoignoit le mesme: le voila donc exclus du fort. Il ne falloit plus qu'estre abandonné en quelque façon des Sauvages. Il auoit espousé la fille de Manitougache, elle ayant receu quelque mescontentement de luy, le quitta là, ce sont les mariages des Sauvages, qui ne se lient que par un lacs courant, il faut peu de chose pour les separer, si ce n'est qu'ils ayent des enfans, car alors ils ne se quittent pas si aisement.

Estant donc ainsi rebuté, il se vint jeter entre nos bras qui n'estoyent
que

que trop ouuerts pour luy, nous luy procurasmes vn habit de François, que le valet de chambre du sieur du Plessis luy donna, bref nous luy fismes tout l'accueil qui nous fut possible, rendans mille graces au bon Dieu de ce qu'il luy auoit pleu exaucer nos prieres.

Ayant donc ceste commodité, ie me mets à trauailler sans cesse, ie fay des coniugaisons, declinaisons, quelque petite syntaxe, vn dictionnaire, avec vne peine incroyable, car il me falloit quelquefois demander vingt questions pour auoir la cognoissance d'un mot, tant mon maistre peu duit à enseigner varioit. O que ie suis obligé à ceux qui m'en-uoierent l'an passé du Petum. Les Sauuages l'aiment déreglement. A toutes les difficultez que ie rencôtrois i'en donnois vn bout à mô maistre pour le rendre plus attentif. Je

ne fçauois assez rendre graces à Nostre Seigneur de cet heureux rencontre. En tant d'années qu'on a esté en ces pais on n'a iamais rien pû tirer de l'interprete ou truchement nommé Marfolet, qui pour excuse disoit qu'il auoit iuré qu'il ne donneroit rien du lāgage des Sauuages à qui que ce fût. Le Pere Charles Lallemant le gagna, ie pense auoir ce qu'il luy bailla, mais cela ne m'eut de rien serui, l'œconomie de la langue toute differente de celles d'Europe n'est point declarée là dedans. Que Dieu soit beny pour vn iamais, sa prouidence est adorable, & sa bonté n'a point de limites.

Il m'a fallu auant que de fçauoir vne langue faire des liures pour l'apprendre, & quoy que ie ne les tienne pas si corrects, si est-ce que maintenant de l'heure que ie parle, quand ie compose quelque chose, ie me fay bien entendre aux Sauuages; le tout

gist à composer souuent, à apprendre quantité de mots, à me faire à leur accent, & mes occupations ne me le permettent pas: ie pensois m'en aller cét hyuer prochain avec eux dans les bois, mais ie preuoy qu'il me fera impossible, lié comme ie suis: si mon maistre ne m'eust point quitté, dans peu de mois i'aurois bien auancé.

I'ay remarqué dans l'estude de leur langue qu'il y a vn certain baragoin entre les François & les Sauvages, qui n'est ny François ny Sauvage; & cependant quand les François s'en seruent, ils pensent parler Sauvage, & les Sauvages en l'vsurpant croient parler bon François. I'en escriuy quelques mots l'an passé, que ie qualifiois de mots de Sauvages le pesant ainsi, par exéple le mot d'*Ania*, dont i'ay encore fait mention cy-dessus, est vn mot barbare, les Sauvages s'en seruent à tout bout

de champ parlant aux François, & les François parlant aux Sauvages, & tous s'en seruent pour dire mon frere, mais en vray Sauvage de Montagnais, *Nichtais*, c'est à dire mô frere aîné, *Nichim*, mon cadet: le mot de *Sagamo* ne s'v surpe icy que par quelques-vns, pour dire Capitaine, le vray mot c'est *Oukhimau*, ie croy que ce mot de *Sagamo* vient de l'Acadie, il y en a quantité d'autres semblables. Au commencement qu'on entre en vn pays, on escrit plusieurs choses, les pensant vrayes sur le rapport d'autrui, le temps decouvre la verité.

On m'a discouru de plusieurs façons de faire de ces nations, nous aurons assez de temps pour voir ce qui en est.

Ie diray en passant que cette langue est fort pauvre, & fort riche. Elle est pauvre, pour autant que n'ayâs point de cognoissance de mille &

mille choses qui sont en l'Europe, ils n'ont point de noms pour les signifier. Elle est riche, pource qu'es choses dont ils ont cognoissance elle est foëconde, & grandement nombreuse, il me semble qu'ils nela prononcent pas bien. Les Algonquains qui ne different des Montagnais que cōme les Prouençaux des Normands, ont vne prononciation tout à fait gaye & gentille.

Ie ne croy pas auoir ouy parler d'aucune langue qui procedast de mesme façon que celle-cy. Le Pere Brebeuf m'asseure que celle des Hurons est d'vne mesme œconómie. Qu'on les appelle Barbares tant qu'on voudra, leur langue est fort reglée, ie n'y suis pas encore grand maistre, i'en parleray quelque iour avec plus d'assurance. Si ie n'auois peur d'estre trop long, ie mettrois icy vne grande & tout à fait estran-

ge difference entre les langues d'Europe & celles-cy.

Le 14. de Nouembre, le Sauuage la Nasse estant chez nous, ie luy fis parler de la Creation du monde, de l'Incarnation, & de la Passiõ du Fils de Dieu, nous passasmes bien auant dans la nuit, tout le monde s'endormoit horsmis luy. Estant de retour en sa cabane, il dit à Pierre qu'il entendoit volontiers parler de cela.

Nous voiant vn iour prier Dieu apres le disner, il tira vn profond soupir, disant: O que ie suis malheureux de ce que ie ne sçay pas prier Dieu comme vous!

Il a souuent dit à Pierre, enseigne vistement cõt homme là, parlant de moy, afin que nous puissions entendre ce qu'il dit. Il vient le soir aux Litanies en nostre Chappelle quand il couche chez nous, & comme il respondoit avec nous *ora pro nobis*,

Pierre se riant de cela, luy demanda s'il entendoit bien ce qu'il auoit dit; Non, dit-il, mais ie croy que cela est bon, puis que ces Peres le disent en priant Dieu. Il nous a tesmoigné qu'il vouloit mourir avec nous, & qu'il ne s'en iroit point que nous ne le chassassions; s'il n'estoit chargé d'une si grande famille, ie souhaitteroie biẽ qu'il fut nostre domestique. Il est quasi assez instruit pour estre baptisé s'il tomboit en danger de mort; mais nous ne nous hasturons point que nous ne scachions bien parler. Comme i'instruisois son petit fils, il me dit, instruis moy, ie retiendray plustost que luy, & ioignant les mains, il disoit la benediction de table.

Ie luy dis vne fois que Dieu defendoit de trauailler certains iours, pource qu'il trauailloit vn Dimanche: il me dit, aduertis moy de ces

iours, & ie les garderay. Lisant les Commandemens de Dieu en sa cabane, quand ie vins à celuy qui recommande aux enfans d'obeir à leurs pere & mere, il se tourna vers les siens, & leur fit signe qu'ils escoutassent; ayant entendu cet autre Commandement, Tu ne tueras point, il me dit qu'on l'auoit voulu inciter à tuer quelqu'un; mais que voyant que c'étoit mal fait, qu'il ne l'auoit pas voulu faire. Voicy vn autre discours.

Pierre Pastedechouan nous a rapporté que sa grand'mere prenoit plaisir à raconter l'estonnement qu'eurent les Sauvages voyans arriuer le vaisseau des François qui aborda le premier en ces pays cy, ils pensoient que ce fust vne Isle mouuante, ils ne sçauoient que dire des grandes voiles qui la faisoient marcher, leur estonnement redoubla voyans quantité d'hommes sur le tillac. Les fem-

mes commencerent à leur dresser des cabanes, ce qu'elles font ordinairement quand de nouveaux hostes arriuent & quatre canots de Sauvages se hasarderent d'abborder ces vaisseaux, ils inuitent les François à venir dans les cabanes qu'on leur preparoit, mais ils ne s'entendoient pas les vns les autres. On leur donna vne barique de pain ou biscuit, l'ayant emporté & reuisté, n'y trouuant point de goust, ils la ietterent en l'eau: en vn mot ils estoient dans le mesme estonnement que fut iadis le Roy de Calecut à l'abbord du premier nauire European qu'il veit près de ses terres; car ayant enuoyé quelques personnes pour recognoistre quels gens amenoit ceste grande maison de bois, les messagers rapporterent à leur maistre que c'estoiēt des hommes prodigieux & espouuentables; qu'ils s'habilloient de

fer, mangeoient des os, & beuvo iēt du sang; ils les auoient veu couuerts de leurs cuirasses, manger du biscuit & boire du vin. Nos Sauvages disoient que les François beuvoient du sang, & mangeoient du bois, appelant ainsi le vin, & le biscuit.

Or comme ils ne pouuoient entendre de quelle nation estoient nos gens, ils leurs donnerent vn nom, qui est tousiours demeuré depuis aux François, *ouemichtigouchiou*, c'est à dire vn homme qui trauaille en bois, ou qui est en vn canot ou vaisseau de bois, ils voyoient nostre nauire fait de bois, leurs petits canots n'estans bastis que d'escorce.

Le 20. de Nouembre nostre Sauvage, c'est ainsi que j'appelleray ce bon Manitougache, surnommé la Nasse, se mit à faire vne cabane de bois dans le bastiment que nous ont brulé les Anglois tout auprès

de nostre petite maison, il fit luy-
mesme de la planche avec vne ha-
che, couppant certains arbres aisez à
refendre : il alla brusler vne vieille
challoupe qu'il auoit veu échoüée
& abandonnée dans vne Isle, & du
clou qu'il en retira, il se fit avec ses
planches vne petite maisonnette ou
cabane assez passable, les autres Sau-
uages la venoient voir, & nos Fran-
çois aussi, loüans son inuention. Je
luy donnay vn nom de Iesus en pa-
pier pour le mettre dedás en quelque
endroit, il l'attacha au pl^r beau lieu.

Il arriua vne chose plaisante à vn
Sauuage qui le venoit voir : ce bon
homme regardoit cette maisonnet-
te de bois, & ne sçauoit par où en-
trer, ne pouuant trouuer la porte,
il tourne & retourne à l'entour de
cette cabane, & croyant qu'il n'y a-
uoit point d'entrée, il s'en alla com-
me il estoit venu, on dira qu'il deuoit

frapper, ce n'est point la coustume des Sauvages, ils entrent par tout sans dire mot, ny sans vous saluer: leurs cabanes ne ferment point, y entre qui veut, ils n'ont qu'une vieille peau qui leur sert de porte; on n'entend point neantmoins parler de larrons parmy eux, cela est fort rare, j'entend des Montagnais: car les Hurons font mestier de dérober, aussi font ils de meilleures cabanes, estans sedentaires, & non vagabons & errans comme ceux de ce pays cy. J'apprend que ces Hurons tiennent un homme pour avoir de l'esprit qui esquive la main du larron, ou qui sçait dérober sans estre reconnu: que s'il est surpris, battez-le tât que vous voudrez, il ne vous dira rien: il souffre patiemment ce chastiment, non en punition du larcin, mais de sa lourdisse, s'estant laissé surprendre.

Le 27. du mesme mois de Nouem-

bre, l'hyuer qui auoit defia paru comme de loin, de temps en temps, nous assiegea tout à fait. Car ce iour & les autres suiuaus, il tomba tant de neige, qu'elle nous déroba la veüe de la terre pour cinq mois.

Voicy les qualitez de l'hyuer, il a esté beau & bon, & bien long. Il a esté beau, car il a esté blanc comme neige, sans crottes & sans pluye. ie ne sçay s'il a pleu trois fois en quatre ou cinq mois, mais il a souuent neigé.

Il a esté bon, car le froid y a esté rigoureux; on le tient pour l'un des plus fascheux qui ait esté depuis long temps. Il y auoit par tout quatre ou cinq pieds de neige, en quelques endroits plus de dix; deuant nostre maison vne montagne: Les vents la rassemblans, & nous d'autre costé la releuans, pour faire vn petit chemin deuant nostre porte, elle faisoit comme vne muraille toute blanche, plus

haute d'un ou deux pieds que le toit de la maison. Le froid estoit parfois si violent, que nous entendions les arbres se fendre dans le bois, & en se fendans faire un bruit comme des armes à feu. Il m'est arrivé qu'en écrivant fort près d'un grand feu, mon encre se geloit, & par nécessité il falloit mettre un rechaud plein de charbons ardens proche de mon écritoire, autrement j'eusse trouvé de la glace noire, au lieu d'encre.

Cette rigueur demesurée n'a duré que dix iours ou environ, non pas continuels, mais à diverses reprises, le reste du temps, quoy que le froid surpasse de beaucoup les gelées de France, il n'y a rien d'intolérable, & ie puis dire qu'on peut icy plus aisément travailler dans les bois, qu'on ne fait en France où les pluies de l'hyver sont fort importunes. Mais il se faut armer de bonnes mitaines,

si on ne veut auoir les mains gelées: Nos Sauvages neantmoins s'en venoient quelquefois chez nous à demy nuds, sans se plaindre du froid: ce qui m'apprend que si la nature s'habituë à cela, la nature & la grace pourront bien nous donner assez de cœur & de force pour le supporter ioieusement; s'il y a du froid, il y a du bois.

J'ay dit que l'hyuer a esté long; depuis le 27 de Nouembre iusques à la fin d'Auril la terre a tousiours esté blanche de neige: & depuis le 29. du mesme mois de Nouemb. iusques au 23. d'Auril, nostre petite riuere a tousiours esté glacée; mais en telle sorte, que cent carosses auroient passé dessus sans l'ébranler: les glaces sont de telle espaisseur, que quand on vint à les rompre, proche de Kebec, pour mettre vne barque à l'eau, le sieur du Pleffis me dit qu'estant à terre, c'e-

Estoit tout ce qu'il pouuoit faire d'atteindre au haut d'une glace avec la fourchette d'un mousquet qu'il tenoit en sa main. Tout cela ne doit espouuanter personne. Chacun dit icy, qu'il a plus enduré de froid en France, qu'en Canada : le Scorpion porte son contrepoison : d'as les pais plus subiects aux maladies, il se trouue plus de remedes : Si le mal est present, la medecine n'est pas loing.

Le 3. de Decembre nous commençâmes à changer de chaussure, & nous seruir de raquettes : quand ie vins à mettre ces grands patins tout plats à mes pieds : ie m'imaginois qu'à tous coups ie donnerois du nez dans la neige, mais l'experience m'a fait voir que Dieu pouruoit commodement toutes les nations des choses qui leur sont necessaires : ie marche fort librement avec ces raquettes ; Pour les Sauvages, cela ne les empesche,

pesche ny de sauter comme des daims, ny de courir cōme des cerfs.

Ils font des souliers de peaux d'E-l'an pour s'en servir sur ces raquettes. Ils n'ont pas l'invention de durcir ou tanner le cuir, aussi n'en ont ils que faire. L'esté ils vont pieds nuds, l'hy-uer il faut que leurs souliers soyent d'une peau maniable, autrement ils gasteroyent leurs raquettes : ils les font larges, & fort amples, pour les garnir de nippes ou de vieux hail-lons contre le froid ; si nous auions quelques peaux de France vn peu plus douces que les grosses ampai-gnes de vache, cela nous feroit vn bien incomparable, notamment sur le renouueau, quand les neges vien-nent à se fondre sur le midy ; car les souliers des Sauvages boient l'eau comme vne esponge, & ces peaux venues de France tiendroyent le pied sec.

Le 5^e de Decembre il fit de grands vents, ce qui est arriué par plusieurs fois. Le Nordest est icy violét, il emporta certain iour vne partie de la couuerture d'un bastiment du fort. Le Pere de Nouë reuenant ce iour là d'y celebrer la saincte Messe, nous dit qu'ils estoient contraincts luy & vn ieune garçó qui l'accompagnoit, de se tenir l'un l'autre de peur que le vent ne les enleuast.

Passant vers ce mesme temps dans les bois où estoient cabanez quantité de Sauuages, ie trouuay vn corps mort, enseueli par les Sauuages, il estoit esleué fort haut sur des fourches de bois, accompagné de ses robes & autres richesses, couuert d'une escorce (c'est leur drap mortuaire.) Je demanday quand on l'enterreroit, ils me respondirent, quand il ne neigeroit plus; la neige tomboit pour lors en abondance.

France, en l'année 1633.

51

A l'occasion de ce rencontre quel-
qu'un me dit qu'un Sauvage estant
mort, les autres frappent sur la caba-
ne crians oué, oué, oué, &c. & com-
me j'en demandois la raison à un Sau-
uage, il me dict que c'estoit pour fai-
re sortir l'esprit de la cabane.

Le corps du mort ne sort point
par la porte ordinaire de la cabane,
ils leuent l'escorce voisine du lieu où
il est mort, & le tirent par là. Je de-
manday pourquoy: ce Sauvage me
repartit que la porte ordinaire estoit
la porte des viuans, & non des morts.
& par consequent que les morts n'y
deuoient point passer. Or comme il
croioit m'auoir bien satisfait, & qu'il
se mocquoit, je luy demanday, si
quand il auoit tué un Castor, il le faisoit
entrer & sortir par la porte commune?
ouy, dit il: elle est donc, luy dis-je, la
porte des morts aussi bien que des
viuans: il repart qu'un Castor estoit

vne beste: alors ie repliquay en riant, vostre porte est donc la porte des bestes, aussi bien que vous l'appellez la porte des viuans; il s'écria, assurément cela est vray, & se mit à rire.

Ie luy demanday encor pourquoy ils enterroient les robes des morts avec eux: Elles leur appartiennent, respondit-il, pourquoy leur osteroit-on?

Si vous les pressez, ils ne s'opiniastrent point, ils suiuent vne certaine routine dans leurs superstitions, dõt ils ne peuuent rendre aucune raison. Voila pourquoy ils sõt les premiers à s'en mocquer quand vous leur faites voir qu'elles sont ridicules. Il est vray que i'en ay veu quelques-vns extrêmement attachez à leurs songes.

Ils font de diuerses sortes de festins, i'en sçay quelques particularitez, mais i'attendray vne autre an-

France, en l'année 1633. 53

née pour en parler avec plus d'assurance. Aux festins des morts ils iettent le reste dans le feu : aux autres festins, c'est à manger tout, & faut creuer plustost que de rien laisser.

Quasi tous les Sauvages ont vn petit Castipitagan, ou sac à petum; les vns sont faits d'une peau de rat musqué, en telle sorte que l'animal semble tout entier: il n'a qu'une petite ouverture par la teste par où ils l'ont écorché: les autres sont faits d'autres animaux, il y en a qui ont une partie du bras & la main de quelque Hiroquois qu'ils ont tué: cela est si bien vuidé que les ongles restēt toutes entieres: vous diriez vraiment une main solide, quand ils l'ont rempli de petum, ou autre chose ie n'en ay point veu, mais on m'a assuré que cela estoit ainsi.

Quelquefois pour monstrier qu'ils

ont du courage, vn Sauvage se liera le bras nud avec vn autre, puis mettant entre leur deux bras sur la chair vn morceau de tondre allumé, ils le laissent consommer iusques au bout, se bruslans iusques aux os: celuy qui retire le bras, & secouë le feu, est tenu pour moins courageux: ie n'ay point veu cette barbarie; on m'a dit qu'un François estant aux Hurons pensa perdre le bras, voulant iouer à ce beau ieu contre vn Sauvage.

Il est vray que les Sauvages sont fort patiens, mais l'ordre qu'ils gardent en leurs exercices les ayde à cōserver la paix dans leurs mesnages: les femmes sçauent ce qu'elles doivent faire, & les hommes aussi: & iamais l'un ne se mesle du mestier de l'autre: les hommes font le corps de leurs canots, les femmes cousent l'écorce avec de l'osier, ou vn petit bois semblable: Les hommes font le

bois des raquettes, les femmes la tiffure: Les hommes vont à la chasse & tuënt les animaux, les femmes les vôt querir, les écorchent & passent les peaux: ce sont elles qui vont querir le bois qu'ils bruslēt, bref ils se mocqueroient d'un homme qui hors d'une grande necessité feroit quelque chose qui deust estre fait par une femme. Nostre Sauvage voyant le Pere de Nouë apporter du bois, se mit à rire, disant, En verité c'est une femme; voulant donner à entendre qu'il faisoit l'office d'une femme: mais quelque temps apres la sienne tombant malade, & n'ayant personne en sa cabane qui le pût soulager, il fût contraint d'en aller querir luy mesme, vray est qu'il n'y alla que sur la nuict pour n'estre veu.

Vn vieillard auoit songé, ou plustost veu, à ce qu'il disoit, une quantité d'Hiroquois, qui se dispersans, à

& là cherchoient les Montagnais: les autres Sauvages consultent là dessus ce qu'il falloit faire, quelques-uns dirent qu'il falloit prendre aduis de ces gens qui parlét à Dieu, entendant parler de nous autres. Ce songe s'en alla en fumée.

Comme ie demandois à Pierre Pastedechouan comment on disoit en sa langue où sont tes freres, vne femme Sauvage suruenant là dessus, il ne me vouloit pas respondre, me donnant pour raison qu'il attristeroit ceste femme, & qu'il la feroit pleurer, à cause que ses freres estoient morts; On ne parle plus des morts parmy nous, me dit-il; voire mesme les parents du defunct ne se seruent iamais des choses dont le mort se seruoit pendant sa vie.

Le 15. du mesme mois de Decembre, quantité d'Alguonquains nous estans venus voir, l'un d'eux me

voyant escrire, print vne plume, & voulu faire le mesme : mais voyant qu'il ne faisoit rien qui vaille, & que ie souffris, il se mit à souffler sur ce qu'il auoit escrit, pensant le faire en aller comme de la poudre. Ie leur fis dire à tous que nous estiós venus pour les instruire, ils respondirent que ie faisois bien d'apprendre la langue, & quand ie la scaurois, q̄ tout seroit facile de part & d'autre.

Le 19. la neige estant desia fort haute, les Sauvages prirent huit élans ou orignaux. Vers ce temps-là l'un d'eux nommé Nassitamirineou, & surnommé des François Brehault, leur dit qu'il auoit songé qu'il falloit manger tous ces Orignaux, & qu'il scauoit bien prier Dieu, & qu'il luy auoit parlé que telle estoit sa volonté, qu'on mangeast tout, & qu'on n'en donnast rien si on en vouloit prendre d'autres : les Sauvages le creurent, & n'en donnerent pas vn 24

morceau aux François. On me raconta cecy en la presence du songeur, il n'aduoüoit pas tout, neantmoins la chose semble bien probable, car ayant cabané auprès de nous, & nous ayant ouy parler de Dieu, il estoit homme pour en parler par après, & faire de l'entendu parmy les gens.

Le 21. de Decembre, le bon Dieu nous donna deux petits pensionnaires, Manitougache nous en ayant présenté vn petit à qui il auoit sauué la vie, nous l'acceptasmes; & comme nous estions en crainte qu'il ne s'en-nuyast tout seul, nous pensions à en trouuer encor vn autre pour luy tenir compagnie. Au mesme temps voila vne femme qui entre chez nous avec son petit fils aagé d'environ sept ans, nous le regardions, disans l'vn à l'autre, voila iustement ce qu'il nous faudroit. ie prends la parole &

m'adresse à sa mere, luy demandant si elle ne voudroit pas bien nous donner son enfant, que nous le nourririons le mieux qu'il nous seroit possible. Helas, dit-elle, i estois venue icy pour prier Manitougache de vous le presenter, & vous supplier de l'accepter. Dieu sçait si nous fusmes contents. ô que sa prouidence est admirable!

Le plus agé que nous a donné Manitougache n'a ny pere ny mere, celuy là nous est bien asseuré, nous luy auons donné nom Fortuné en attendant qu'il soit capable d'estre baptisé: ô qu'il a rencontré vne bonne fortune! Estant à Tadoussac, comme il estoit delaisné de tout le monde, vn Sauvage presenta vne harquebuse à nostre Pierre, luy disant, tuë ce miserable enfant, aussi bien n'aiant point de parents, il fera toute sa vie abandonné d'un chacun: Nostre

Sauuage entendant cela en eut compassion, il le retira, & l'a nourry iusques à present qu'il nous l'a donné. Nous auons appellé le plus ieune Bienueu, celuy-cy a de l'esprit, il est d'un naturel complaisant, & flatteur: Nous ne sommes pas si asseurez qu'il nous demeure, car les Sauuages sont extrêmement changeâs & volages. Vn sien parent entendant qu'il nous estoit donné, s'y voulut opposer, disant que leur Capitaine auoit defendu qu'on ne donnast aucun enfant aux François: la mere de l'enfant suruiuent là dessus, & dit que le Capitaine n'a point nourry son fils, & par consequent que ce n'est pas à luy d'en disposer, si bien à elle qui en estoit la mere, & qui l'auoit tousiours élevé dès sa ieunesse. Le pere de l'enfant ayant sceu que son ancienne femme qu'il a quittée nous l'auoit donné, en a esté bien aise, disant qu'il seroit

France, en l'année 1633.

61

tres-bien avec nous. Celuy qu'on nous auoit promis l'an passé voudroit bien estre maintenant avec les deux autres : mais il n'est pas encore temps de s'en charger, il ne faut point embrasser par dessus ses forces. C'est vn plaisir de voir ces deux enfans, ce sont mes petits escoliers, ils commencent à lire, ils scauent prier Dieu en Latin, & en leur langue : Ils nous font quelquefois rire par leurs petits discours : deuant qu'ils mangent nous leur faisons dire le *Benedicite*. Voila pourquoy quand ils veulent manger, ils s'en viennent nous dire, mon Pere, *Benedicite* : c'est à dire, donnez moy à disner. Comme ils voyoient donner à manger à vn petit chien, ils nous disoient qu'il n'auoit pas dit son *Benedicite*. Je m'en vay, dit l'vn d'eux, le dire pour luy ; comme nous rions, son compaignon luy dit, *nama irinifio-nakhi attimoukhi*, les chiens n'ont point

d'esprit, ils ne disent pas leur *Benedicite*, c'est à faire aux hommes seulement; vous les entendriez allans & venans ruminer le *Paternoster*, en prononcer tantost vne partie, tantost l'autre, en quoy il arriua vn iour vn rencontre agreable. Le sieur Emery de Caën dînant en nostre maison, comme on seruoit sur table le peu que nous auions, l'vn de ces enfans regardant ce qu'on presentoit, & voyant bien que ce n'estoit pas pour luy, commence à dire par rencontre; *Et ne nos inducas in tentationem*, cela fit rire toute la compagnie.

Le second iour de Ianuier, ie vey quelques Sauvages qui s'efforçoient de passer dans leurs canots la grande riuere de S. Laurens: ce fleuve ordinairement ne gele point au milieu: il charie ou porte d'horribles glaces, selon le cours & mouuement de la marée. Ces pauures gens abordoient

de grandes glaces flottantes, les fondoient avec leurs auires, montoient dessus, tiroient leurs canots après eux pour s'en aller prendre l'eau à l'autre costé de ces glaces; quoy qu'ils soient tres-habiles, il ne laisse pas de s'en noyer quelques-vns.

Voyant vn Sauvage qui traifnoit sa mere apres soy sur la neige. Les chariots & carrosses de ce pays-cy sont des traifnes faites d'escorce ou de bois, les cheuaux sont les hommes qui les tirent apres eux: voyant donc ceste pauvre vieille liée sur vne d'icelles, son fils ne la pouuant commodement faire descendre par le sentier ordinaire d'vne montagne qui borde la riuiere où il alloit, la laissa rouler à bas par l'endroict le plus roide, & s'en alla la requerir par vn autre chemin. Ne pouuant supporter cette impieté, ie le dy à quelques Sauvages qui estoient auprès de

moy: ils me respondirent, que veux-tu qu'il en fasse, aussi bien s'en va elle mourir, prens la & la tuë, puis que tu en as compassion, tu luy feras du bië, car elle ne souffrira pas tât, peutestre que son fils la laissera au milieu des bois, ne la pouuât ny guerir ny traifner apres soy, s'il ne trouue point de quoy manger. Voila comme ils soulagent les malades qu'ils croyent de uoir mourir, ils leur aduancent la mort par quelque coup de baston ou de hache, quand ils ont beaucoup de chemin à faire, & cela par compassion.

Le troisieme du mesme mois, la femme de nostre Sauvage estant malade, il me vint demander mon canif pour la saigner. Les Sauvages se tirent du sang de la teste. Estant vn iour en vne cabane, vne Sauvage regardant vne escrtoire que ie tenois, prit dextrement le canif sans que ie m'en

France, en l'année 1613. 65

m'en apperceusse, & s'en fit quelques
ouuertures au hault du frond, puis
elle me le rendit, ie fus estonné la
voyant saigner; elle me dit qu'elle
auoit mal à la teste, & qu'elle se vou-
loit guerir. Or comme ils ont veu
nostre façon de saigner, & qu'ils la
trouuent bonne, La Nasse me vint
prier d'aider en cela sa femme. Ie luy
respondis que ie n'y entendois rien:
& comme il vouloit prendre mon
canif, ie luy dis qu'il attendist au iour
suiuant, & que ie prierois le Chirur-
gien de la venir voir; ce qu'il fit. Ce
pendant ie l'allay visiter en sa caba-
ne: il faisoit vn grád froid, elle estoit
teste nue à leur accoustumee, mor-
dant dans vn peloton de nege; c'e-
stoit seulement pour guerir vn gros
rhume qui l'estouffoit. Voila les de-
licateffes du païs. Le lendemain estât
saignée elle ne tarda gueres à aller
querir du bois à son ordinaire. Voiez

E

si ceux qui font profession de souffrir quelque chose pour Dieu, ne doiuent pas estre confus voyans de tels exemples.

Nous n'auons point esté solitaires tout l'hiuer, nombre de Sauuages nous sont venus voir, ils sont passez à grosses bandes deuant nostre maison s'en allans à la chasse del'Orignac.

Le Prince, & sa mere la Princesse, c'est ainsi que les François appellent vn Sauuage de bonne façon: Vous diriez que ceste famille a ie ne scay quoy de noble; & s'ils estoient couuerts à la Françoisse, ils ne cederoient point en bonne mine à nos gentils-hommes François.

Ce ieune homme nous estant venu visiter, ie luy demanday s'il auoit vn fils, & s'il ne seroit pas bien content de nous le donner pour l'instruire, il me dit que ouy; sa mere

conduisant vne petite fille, moy croyant que ce fut vn garçon, ie l'appelle, disant à sa grand' mere qu'elle nous le donnast, elle se mit à rire: me doutant que c'estoit vne fille, ie luy dis que nous ne les prenions point, mais qu'il y viendrait quelque iour d'honnestes filles de Frâce pour enseigner leurs filles, alors, me dit-elle, ie donneray celle-cy.

Je preuois qu'il est tout à fait nécessaire d'instruire les filles aussi bien que les garçons, & que nous ne ferons rien ou fort peu, si quelque bonne famille n'a soin de ce sexe; car les garçons que nous aurons eleuez en la cognoissance de Dieu venans à se marier à des filles ou femmes Sauvages accoustumées à courre dans les bois, leurs maris seront obligez de les suiure, & ainsi retomber dans la barbarie, ou bien de les quitter, qui seroit vn autre mal fort dangereux.

N'y a-il point quelque Dame en France, qui ait assez de cœur pour fonder icy vn Seminaire de filles, dõt la conduite feroit premierement donnée à quelque bõne veufue courageuse, accompagnée de deux braves filles, qui demeureroient en vne maison qu'on pourroit dresser proche de ceste honneste famille qui est icy? Il y a des Dames dans Paris qui emploient tous les ans plus de dix mille francs en leurs menus plaisirs: si elles en appliquoient vne partie pour recueillir les gouttes du sang du Fils de Dieu respandu pour tant d'ames qui se vont perdans tous les iours faute de secours, elles ne rougiroient pas de honte au iour qu'elles paroistront deuant Dieu, pour rendre compte des biens dont il les a faits œconomes; cela est bien plus aisé à dire qu'à executer.

Le 10. de Ianuier le froid estoit

fort violét, Je ne voy le iour la plus part de l'hyuer qu'au trauers des glaces: il se fait vne crouste de glace sur les chassis de ma cellule ou chambrette, laquelle tombe comme vne losange ou carreau de verre quand le froid se vient à relascher: C'est au trauers de ce crystal que le Soleil nous communique sa lumiere. I'ay souuent trouué de gros glaçons attachez le matin à ma couuerture, formez du souffle de l'haleine; & m'oubliant de les oster le matin, ie les trouuois encore le soir: I'en ay quelquefois veu en France, mais peu souuent & bien petits, à comparai-son de ceux-cy.

Comme nous n'auons ny fontai-ne, ny puy, il nous faut aller tous les iours puiser de l'eau à la riuier^e, de laquelle nous sommes esloignez enui-ron 200 pas: mais pour en auoir, il faut fendre la glace à grands coups

de hache, & encor faut-il attendre que la mer monte, car la marée estât basse, on ne peut auoir d'eau pour l'espaisseur des glaces. Nous iettons ceste eau dans vn poinçon qui n'est pas loing d'un bon feu; & cependât il faut auoir vn grand soin tous les matins de rompre la crouste de glace qui se forme dans ce vaisseau, autrement en deux nuicts tout ne seroit qu'un glaçon, le poinçon fut-il plein.

Vn de nos François ayant soif dâs les bois, & voulant lescher vn peu de neige qui estoit sur vne hache qu'il tenoit, venât à toucher le fer, sa langue se cola & gela si promptement & si fortement, que venant à retirer soudainement la hache pour le froid qu'il sentoit, il enleua quant & quât toute la peau de sa langue.

Tout cecy m'auroit quasi fait croire en France que ce pays est in-

supportable: i'aduouë qu'il y a quelques iours bien ferrans & pressans, mais ils sont peu en nombre, le reste est plus que tolerable. On se roule icy sur la neige, comme en France sur l'herbe de nos prairies, pour ainsi dire, cen'est pas qu'elle ne soit aussi froide comme elle est blanche, mais les iours sont beaux, le Soleil plus chaud qu'en plusieurs endroicts de France; nous sommes, dit on, dans le mesme parallelle que la Rochelle; la moindre action qu'on fait la pluspart du temps bannit la rigueur du froid.

Combien de fois trouuant quelque colline ou montagne à descendre, me suis-je laissé rouler à bas sur la neige, sans en receuoir autre incommodité, sinon de changer pour vn peu de temps mon habit noir en vn habit blanc, & encore cela se fait-il en riant; car si on ne se soustient bien assis sur ses raquettes, on se blâ-

chit aussi bien la teste, que les pieds.

Combien de fois ay-ie fait le mesme sur des glaces fort hautes, qui bordoient la riuiere sur laquelle ie voulois aller. Ce fut vn Sauvage qui m'apprit ce secret connu de tout le monde: il passoit deuant moy, & voyant que sa teste estoit en danger d'arriuer à la riuiere plustost que ses pieds, il se laissa rouler tout du long des glaces, & moy apres luy: le bon est qu'il ne faut que faire cela vne seule fois, pour sçauoir le mestier. I'auois peur au commencement, car la marée montant, & souleuant ces grands corps de glaces, les ouure en plusieurs endroits: & quelques bouillons rejallissans sur les bords de la riuiere, font vne glace assez mince sur la plus épaisse: quand vous venez à marcher sur ceste premiere glace, elle rompt sous vous: si bien qu'au commencement ie pésois que

tout alloit fondre, mais ie ne croy pas que des canons fissent branler la plus grosse glace. Quand on vient sur le printemps, c'est alors qu'il y a du danger de rencontrer quelque ouuerture qui vous fasse couler là dessous.

Le 12. du mesme mois, vn Sauua-ge me vint dire que le Pere de Nouë estoit cause d'un vent qui souffloit: ie luy en demanday la raison; Il me dit qu'encore bien que le ciel fut fort rouge au matin, le Pere n'auoit point laissé d'aller trauailler au bois de bonne heure, & que cela estoit cause du vent: Que les Montagnais voyans le ciel enflammé, se tiennent en repos dans leurs cabanes, & par ce moyen arrestent le vent. I'aduerti-
ray, dit-il, vne autrefois le Pere de Nouë qu'il ne parte point si matin quand le temps sera rouge, & il verra par experience qu'il ne ventera

point. Je me mis à rire, & tachay le mieux que ie peu d'effacer de sa pensée cette superstition, en fin il s'en mocqua aussi bien que moy; ce n'est pas pourtant qu'il la quitte si aisément, car les Sauvages vous accordent facilement ce que vous leur dites, mais ils ne laissent pas d'agir toujours à leur façon.

Passans de discours en discours, ie luy parlay de Dieu qui a tout fait; car c'est là où ie vise de leur donner quelque cognoissance de celuy qui leur a donné la vie, afin qu'ils s'en entretiennent les vns les autres, & que les enfans en oyent parler dès leur jeunesse. Luy discourant donc en mon barragoin, & plus souuent par gestes & par signes qu'autrement, car ie parle plus de la main que de la langue, ie luy fis concevoir quelque chose de la puissance de Dieu: alors il me dit que le Dieu de France estoit

bien plus puissant & plus grand Capitaine ou Seigneur que le Dieu de son pays : Car, dit-il, vostre Dieu est grand, & le nostre, ou bien ses enfans viennent d'un rat d'eau que les François appellent rat musqué.

Mais à propos de musc, les Sauvages n'en peuvent supporter l'odeur : Quelqu'un m'a dit qu'ayant sur soy quelque chose semblable, ils luy disoient qu'il sentoit mal ; aussi tiennent-ils cet animal puant, & quelque vieux morceau de graisse leur semblera de bonne odeur. Or iugez maintenant s'il y a des objets plus conformes à l'odorat les uns que les autres, & si nos fantaisies avec l'accoustumance n'ont pas un grand pouuoir sur nous.

Puis que ce Sauvage m'a donné occasion de parler de leur Dieu, ie diray que c'est un grand erreur de croire que les Sauvages n'ont co-

gnoissance d'aucune diuinité: ie m'étonnois de cela en France, voyant que la nature auoit donné ce sentiment à toutes les autres nations de la terre. Je confesse que les Sauuages n'ont point de prieres publiques & communes, ny aucun culte qu'ils rendent ordinairement à celuy qu'ils tiennent pour Dieu, & que leur cognoissance n'est que tenebres: mais on ne peut nier qu'ils ne recognoissent quelque nature superieure à la nature de l'homme: comme ils n'ont ny loix ny police, aussi n'ont-ils aucune ordonnance qui concerne le seruice de ceste nature superieure, chacun fait comme il l'entend: ie ne sçay pas leurs secrets, mais de ce peu que ie vay dire, on verra qu'ils cognoissent quelque diuinité.

Ils disent qu'il y a vn certain qu'ils nomment *Atahocan*, qui a tout fait: parlant vn iour de Dieu dans vne ca-

bane, ils me demanderent que c'estoit que Dieu; ie leur dis que c'estoit celuy qui pouuoit tout, & qui auoit fait le Ciel & la terre: ils commencerent à se dire les vns aux autres *Atahocan, Atahocan, c'est Atahocan.*

Ils disent qu'un nommé Messou repara le monde perdu dās les eaux; Vous voyez qu'ils ont quelque tradition du deluge, quoy que meslée de fables, car voicy comme le monde se perdit, à ce qu'ils disent.

Ce Messou allant à la chasse avec des loups ceruiers, au lieu de chiens, on l'aduertit qu'il faisoit dangereux pour ses loups (qu'il appelloit ses freres) dans un certain lac aupres duquel il estoit. Un iour qu'il poursuioit un eslan, ses loups luy donnerēt la chasse iusques dedans ce lac: arriuez qu'ils furent au milieu, ils furēt abyfmez en un instant. Luy suruenāt là dessus, & cherchant ses freres de

tous costez, vn oiseau luy dit qu'il les voyoit au fond du lac, & que certaines bestes ou monstres les tenoient là dedans: il entre dans l'eau pour les secourir, mais aussi-tost ce lac se desborde, & s'aggrandit si furieusement, qu'il inonda & noya toute la terre.

Le Messou bien estonné, quitte la pensée de ses loups, pour songer à restablir le monde. Il enuoye vn corbeau chercher vn peu de terre, pour avec ce morceau en restablir vn autre. Le corbeau n'en peut trouver tout estant couuert d'eau. Il fait plonger vne loutre, mais la profondeur des eaux l'empescha de venir iusques à terre. En fin vn rat musqué descendit, & en rapporta: Avec ce morceau de terre il remit tout en estat: il refit des troncs d'arbres, & tirant des flèches à l'encontre, elles se changeoient en branches. Ce seroit vne longue fable de raconter

comme il repara tout: comme il se vangea des môstres qui auoient pris les chasseurs, se transformant en mille sorte d'animaux pour les surprendre: bref ce beau Reparateur estant marié à vne foury musquée, eut des enfans qui ont repeuplé le monde.

On voit par ces contes que les Sauvages ont quelque idée d'un Dieu: Je dis bien dauantage, qu'ils ont quelque espece de sacrifice. Le Pere Brebeuf m'a assuré qu'hyuer-
nant avec eux, il leur vit mettre vn petit Essan ou Orignac sous la cendre, & le brusler. Il cognut depuis qu'à mesme temps on en auoit brûlé vn en la mesme façon en vne autre Cabane, & demandant la raison de cela, ils luy dirent que c'estoit pour la santé d'un malade.

Il y a des hommes parmy eux qui font profession de consulter leur

Manitou; il me semble que par ce mot de Manitou ils entendent, comme entre nous, vn Ange, ou quelque nature puissante. Je croy qu'ils pensent qu'il y en a de bons & de mauvais, i'en parleray plus asseurément quelque iour.

Le Gendre de nostre Sauvage voulant aller à la chasse, le consulta tout auprès de nostre maison: Il fit vne petite Cabane de bois, se renferma là dedans. Sur la nuit, chantant, criant, hurlant: les autres estoient à l'entour de luy, ie priay vn François de tirer vn coup d'arquebuse pour les espouuanter par le bruit, mais ie ne scay s'ils l'entendirent, tant ils se demenoient. Le Manitou luy dit qu'il allast à la chasse d'vn certain costé, qu'il y trouueroit des Orignaux, & point d'Hiroquois; le Manitou fut trouué menteur, car il reuint bien affamé, n'ayant quasi rien trouué.

Pour

France, en l'année 1633.

81

Pour les Hiroquois, il n'en pouuoit
rencontrer, car il s'écartoit bien loin
d'eux: ie croy que la pluspart de ces
consulteurs de Manitou, ne sont que
des trompeurs & charlatans; neant-
moins quand ils recommandent
quelque chose, cela est executé
de point en point. S'il disoit aux
Sauuages que le Manitou veut qu'on
se couche nud dans la neige, qu'on
se brusle en quelque endroict, il se-
roit obey: & au bout du conte, ce
Manitou ou Diable ne leur parle
non plus qu'à moy.

Je me doute neantmoins qu'il y
en a quelquesvns qui ont vrayemēt
communication avec le Diable, s'il
est vray ce qu'en disent les Sauuages,
car on les voit marcher sur leurs ca-
banes sans les rompre: ils deuiēent
furieux & comme possedez, donent
des coups capables d'assommer vn
bœuf, & neantmoins la douleur pas-

F

se en peu de temps : sans grand outrage on les void tout en sang , puis gueris en vn moment. Ils racontent quantité d'autres choses semblables, mais quãd ie les presse, ils m'aduouët franchement qu'ils n'ont point veu cela , ains seulement qu'ils l'ont ouy dire. Il ne faut pas leur faire grandes obiections sur leurs fables, pour les arrester, & leur faire perdre terre.

Le 15. du mesme nostre Sauuage nous vint trouuer, & nous dit qu'un de ses gendres auoit songé que nous luy donnassions aussi long que la main de petum, ou tabac; le luy refusay, disant que ie ne donnois rien pour les songes, & que ce n'estoit que folie, que ie leur expliquerois comme ils se forment quand ie scaurois leur lãgue. Il me repart que toutes les nations auoient quelque chose de particulier; que si nos songes n'estoient pas vrays, si bien les leurs:

& qu'ils mourroient s'ils ne les met-
toient en execution. A ce conte nos
vies dependét des songes d'un Sau-
uage, car s'ils refusoient qu'il nous faut
tuer, infailliblement ils nous tue-
roient, s'ils pouuoient. On m'a dit
qu'autrefois l'un deux ayant songé
que pour estre guery d'une maladie
qui le trauailloit, il luy falloit tuer
un certain François, il l'enuoye ap-
peller. Entré qu'il fut en sa cabane,
il luy disoit, approche mon frere, ie
te veux parler: sa femme qui scauoit
le dessein de son mary, dit au Fran-
çois qu'il se donnaist bien garde d'ap-
prochet: & de fait ce malade auoit
mis une hache à son costé pour l'as-
sommer. Voila l'une des risques de
nostre vie: cela ne m'estonne point,
on peut mourir pour Dieu en mou-
rant par un songe.

Pour reuenir à nostre Sauuage, ie
luy demanday s'il faudroit executer

mon songe, au cas que i'eusse songé que ie le deurois tuer? il repart que le songe de son gendre n'estoit point mauuais: & tout ainsi qu'il nous croyoit quād nous luy disions quelque chose, ou que nous luy montrions quelque image: de mesme que nous luy deuions croire quand il nous disoit quelque chose propre de sa nation: qu'au reste il s'estonoit que nous autres qui n'vsions point de tabac, l'aimions tant. En fin il luy en fallut bailler, en luy faisant bien entendre que ce n'estoit point en consideratiō de son songe, & qu'on luy refuseroit tout ce qu'il demanderoit sous ce pretexte. Il nous dit qu'il ne croiroit plus à ces fantaisies, mais que son gendre estoit libre: ceste superstition est trop enracinée dans son esprit pour la quitter si aisément.

Le 21. du mesme, ie baptisay vn

petit Sauvage âgé d'environ 3 ans, frappé d'une maladie mortelle : & voyant qu'il estoit en danger de mourir dans les bois, sa grand'mere le traînant avec soy de part & d'autre, nous luy demandâmes au cas qu'il guerit, si elle ne voudroit pas bien nous le donner pour le nourrir & l'instruire: Elle respondit que s'il n'estoit si malade, qu'elle nous le donneroit dès lors. Ses parents y consentirent: ce qui nous fit resoudre à le baptiser. Nostre Pierre luy donna son nom: ce pauvre enfant pourra traîsner quelques années, mais il n'y a gueres d'esperance qu'il puisse jamais recouvrer sa santé.

Sur la fin de Januier, le fils & les gendres de nostre Sauvage estans vers le Cap de Tourmète, manderēt à leur pere, qui estoit cabané auprès de nous, qu'il y auoit bonne chasse en ce quartier là: Il s'y en alla avec

le reste de sa famille: puis nous retournant voir, il nous dit que si nous l'aimions nous l'allassions visiter en sa cabane, qu'il nous donneroit de la chair d'Essan: Vous m'auez, disoit-il, donné de vos biens quand j'auois faim: mes gens croiront que vous estes faschez cōtre moy si vous ne nous venez pas voir. Il nous donna nouvelle que le Sauvage Brehaut estoit mort, & qu'il auoit laissé deux enfans, vn garçon & vne petite fille. Or comme nous desirerions bien d'en enuoyer quelques-vns en France pour les faire instruire, afin qu'ils peussent par apres secourir leur nation, le Pere de Nouë prit resolution de suiure ce bon Sauvage, cene fut pas sans peine, voicy les particularitez de son voyage. Les hostelleries qu'on trouue en chemin sont les bois mesmes: à l'entrée de la nuict on s'arreste pour cabaner; cha-

cun desfait ses raquettes, desquelles on se sert comme de pelle pour vuidier la neige de la place où on veut coucher. La place nette, & faite en rond ordinairement, on fait du feu tout au beau milieu, & tous les hostes s'affient à l'entour, estans abriez par le dos d'une muraille de neige, ayans le Ciel pour couverture de la maison. Le vin de ceste hostellerie c'est l'eau de neige fondue dans une petite chaudiere qu'on porte avec soy, si on ne veut manger la neige pour boisson : Les meilleurs mets sont un peu d'anguille boucanée. Comme il faut porter sa couverture avec soy pour se couvrir la nuit, on ne se charge que le moins qu'on peut d'autres choses.

Le Pere estant arriué dans la cabane, on ne scauoit quelle chere luy faire : Il n'y a point icy de complimens, on ne dit ny bon iour, ny

bon soir. Tout leur tesmoignage de resiouyſſance ou action de graces consiste en ceste aspiration, Ho! ho! ho! ho! &c. On saluë icy le monde par effects. Aussi-toſt chacun ſe met en deuoir, l'un met de l'eau dâns la chaudiere, ou pluſtoſt de la neige; l'autre la met ſur le feu; l'autre iette dedans de grandes pieces de chair d'Eſlan, ſans la lauer de peur de perdre la graiſſe: cela eſtant cuit à demy, on le retire pour en remettre d'autre. Comme on eſtoit en cet exercice, voicy l'un des gendres de la Naſſe qui reuient de la chafſe, apportant deux Caſtors: auſſi-toſt en tesmoignage de resiouyſſance de la venue du Pere, il les met en pieces, & les iette dans la chaudiere. Vn autre luy fait preſent d'un ieune Caſtor fort delicat, mais avec prieres qu'on ſe donnaſt bien garde de donner les os aux chiens, autrement ils croient

qu'ils n'en prendroient plus: ils brûlent ces os fort soigneusement, si les chiens les mangeoient, la chasse ne vaudroit plus rien. Le Pere me dit qu'il s'estonnoit du degast de viande qu'ils faisoient. Voila vn grand mal pour ce miserable peuple, quand il a de quoy, ce ne sont que festins; & la pluspart du temps il meurt de faim le lendemain. On alla à trois lieuës delà chercher vn Orignac qu'ils auoient tué, pour en donner la chair au Pere, avec mille excuses, en deux mots, que peutestre ne le trouuerions nous pas bon. Ils pressoient le Pere de demeurer quelques iours avec eux, disans qu'ils auoient veu du bois rongé, & qu'infailiblement ils trouueroient d'autres Elans.

Le Pere voulant partir, lon fait trois traînes qu'on charge de chair; l'une pour luy, l'autre pour nostre Pierre qui estoit allé là; la troisieme

pour vn François qui accompagnoit le Pere. A peine auoient-ils fait deux cens pas apres leurs adieux, que le Pere demeure tout court, il ne voyoit goutte, & n'entendoit rien: la fumée de la Cabane, les neiges de dehors, le defaut de nourriture, car il n'auoit mangé qu'un peu de ceste chair à demy crüe, le trauail du chemin l'affoiblirent si fort, qu'il fut contraint de retourner d'où il venoit. Il auoit bien porté vn peu de pain & de pois, mais les Sauvages s'en faisirent incontinent, tant ils en font aides, luy disant qu'il en mangeroit tant qu'il voudroit estant de retour en nostre maison. Le bon Sauvage La Nasse voyant la debilité du Pere, luy demande s'il veut demeurer; Non, dit-il, mais ie ne puis traîner ce fardeau que tu m'as donné. Allons, respond le Sauvage, ie le traîneray pour toy, & ie prendray

ceste grande peau de loup marin pour t'envelopper dedans, & te traifner en ta maison: si tu es malade, prends courage, ie ne t'abandonneray point. Ils s'en reuindrent à la maison le mieux qu'ils purent: nostre Pierre courut deuant apporter les nouuelles: Nous enuoyasmes viste vn garçon avec vne bouteille de cidre, & du pain, pour leur donner courage. Le vent leur donnoit si violemment en face, qu'ils furent contrainsts de laisser leurs traifnes à trois lieuës de Kebec, on les renuoya querir le iour suiuant. Le Pere qui n'estoit malade que de foiblesse & de trauail, ayant trouué le repos, se remit incontinent.

Voila, mon Reuerend Pere, vn eschantillon de ce qu'il faut souffrir courant apres les Sauuages, ce qu'il faut faire necessairement si on les

veut ayder à se sauuer: Et partant que V. R. voye s'il luy plaist qui seront ceux qu'elle destinera pour ceste mission. On ne souffre point ces incommoditez demeurant dans la maison, tout ce qu'on y endure est tolerable: mais quand il faut deuenir Sauvage avec les Sauvages, il faut prendre sa vie, & tout ce qu'on a, & le ietter à l'abandon, pour ainsi dire, se contentant d'une croix bien grosse & bien pesante pour toute richesse. Il est bien vray que Dieu ne se laisse point vaincre, & que plus on quitte, plus on trouue: plus on perd, plus on gagne: mais Dieu se cache par fois, & alors le Calice est bien amer.

Vne chose me semble plus qu'intolerable, c'est qu'on est pelle-messe; fille, femme, homme, garçons tous ensemble dās vn trou enfumé; & plus on s'auance en la cognoissan-

ce de la langue, plus on entend de saletés. Dieu veuille que les yeux n'en soient point offenzés, on me dit que non. Je ne pensois pas que les Sauvages eussent la bouche si puante comme ie le vay remarquant tous les iours. Coucher sur la terre couverte d'un peu de branches de pin, n'auoir qu'une écorce entre la neige & vostre teste, traifner vostre bagage sur des montagnes, se laisser rouler dans des vallons espouuâtables, ne manger qu'une fois en deux ou trois iours quand il n'y a point de chasse, c'est la vie qu'il faut mener en suiuant les Sauvages. Il est vray que si la chasse est bonne, la chair ne vous est point épargnée: sinon il faut estre en danger de mourir de faim, ou de bien souffrir. Un de nos François qui a demeuré avec eux cét hyuer passé, nous a dit qu'il n'auoit mangé en deux iours qu'un petit bout de

Relation de la Nouvelle

chandelle qu'il auoit porté par mes-
garde dans sa pochette. Voila peut-
estre mon traitement pour l'hyuer
prochain, car si ie veux scauoir la
langue, il faut de necessité suiure les
Sauuages. Je crains neantmoins que
nostre famille accreuë ne me retien-
ne cette année, mais il y faut aller tost
ou tard, i'y voudrois desia estre, tant
i'ay de mal au cœur de voir ces pau-
ures ames errâtes sans aucun secours
faute de les entendre. On ne peut
mourir qu'une fois, le plustost n'est
pas tousiours le pire. Changeons de
✱ propos: Il faut que ie remarque icy
vne iniure que les Sauuages donnent
aux François, c'est qu'ils aiment ce
qu'ils ont: quand vous refusez quel-
que chose à vn Sauuage, aussi-tost il
vous dit *Khisakhitan*: tu aime cela,
sakhita, sakhita, aime le, aime le, com-
me s'ils vouloient dire qu'on est at-
taché à ce qu'on aime, & qu'on

le prefere à leur amitié.

Nostre Sauvage voudroit bien viure avec nous comme frere, en vn mot il voudroit entrer en communauté de tout. Ie te donneray, dit-il, de tout ce que i'ay, & tu me donneras de tout ce que tu as : Ce seroit le moyen de manger en vn mois toutes les prouisions d'vne année, car ils ne cessent de manger tant qu'ils ont de quoy, n'en ayant plus, ils en cherchent, & en demandent avec importunité. Il est vray que ce bon homme voit bien que ceste procedure n'est pas bonne : & quand ie luy presente qu'il ne fait pas bien, prodiguant ses viures en peu de temps : ce n'est pas moy, dit-il, qui fait cela, c'est ma femme. Il s'estonne quand nous luy faisons manger d'vn morceau d'Ours ou d'Orignac six sepmaines apres qu'il nous l'a donné ; car en ce temps-là on mangera deux & trois

& quatre ours en sa cabane; si on en prend autant.

Le 13. de Feurier Dieu nous fit vne faueur fort signalée: Mon maître nommé en sa langue comme i'ay desia souuent dit Pierre Pastedechouan, s'en alla sans nous rien dire. Depuis qu'il estoit avec nous, il s'estoit vn peu remis: il se confessoit de tēps en tēps sās se vouloir cōmunier, quoy qu'on luy dit. Sa raison estoit que iamais il ne s'estoit communié en son pays, si bien en France: mais i'estois là mieux disposé qu'icy, disoit-il. Comme il sentit approcher le Carefme, il nous fit plusieurs interrogations sans que nous prissrōs garde où elles buttoient: scauoir mō à quel âge on estoit obligé de ieufner, si dans tout le Carefme on ne mangeroit point de chair, & choses semblables. La peur qu'il eut du ieufne, & la croyance qu'il auoit que
les

les gens de la Nasse auroient bone
chasse, fit qu'il s'en alla les trouuer
sans nous en parler. Voyant mon
secours perdu pour la langue, nous
demandasmes derechef à Dieu qu'il
luy pleust nous donner pour la se-
conde fois celuy qu'il nous auoit dō-
né pour la premiere. La Theologie
de ce bon aueugle né n'est pas bon-
ne, qui dit que Dieu n'exauce point
les pecheurs, si fait bien quand il luy
plaist. La Nasse ayant mangé toute
sa chasse, & n'en trouuant plus dans
les bois, la faim le pressa si fort, qu'il
ne sçauoit de quel costé se tourner.
Nostre Pierre se voyant dans le ieuf-
ne deuant que d'estre en Carefme,
ayant pensé perdre la vie sur vne
glace qui coula dessous luy, & passé
quatre iours sans quasi rien manger,
nous reuient voir tout defait apres
15 iours d'abséce, il ne nous dit point
que la famine le ramenoit, aussi at-

tribuay-ie son retour à celuy qui nous le donnoit pour la seconde fois: Il demeura donc avec nous iufques à Pasques, m'aydant à conclure ce que i'auois enuie d'acheuer de nostre Dictionnaire.

Le Vendredy Sainct, il s'en voulut aller à la chasse avec nostre Sauuage qui estoit de retour, mais ie luy dis qu'il n'iroit point qu'il ne se fust acquitté du deuoir que doiuent rendre à Dieu tous les Chrestiens en ce tēps-là; i'aduerty nostre Sauuage de ne le point receuoir en sa cōpagnie; ce qu'il fit. Il se confessa donc & se communia le iour de Pasques. Le lendemain nostre Sauuage retournant pour vendre au sieur de Caën vn ieune Eflan qu'il auoit pris tout vif (lequel mourut depuis) nostre homme l'accosta, & luy dit que nous ne l'auions retenu sinon pour prier Dieu le iour precedēt, & que l'ayant

fait nous estions contents qu'il le suivit: Il est vray que pour le contenter nous luy auions dit que s'estant acquitté de ses deuotiōs, il pourroit s'en aller à la chasse à la premiere occasion, ce qu'il a fait avec promesse de retourner, mais nous ne l'auōs point veu depuis. Dieu soit beny de tout: ie ne m'osois promettre tout ce que i'ay tiré de luy, i'en ay assez pour me rendre capable d'aller hyuerner parmi les Sauuages, avec profit.

La Nasse reuenant de la chasse nous dit que ce pauvre ieune homme auoit trauersé les bois pour aller trouuer ses freres à Tadoussac: pour moy i'estime qu'il a la foy, i'en ay de tres-grands indices: mais comme c'est vne foy de crainte & de seruitude, & que d'ailleurs il est enchainé par vne infinité de mauuaises habitudes, il a de la peine de quitter la liberté blasmable des Sauuages,

Le 21. de Mars, vn Sauvage mangeant chez nous à terre, selon leur coustume, s'arresta tout court, disant qu'il ne mangeroit pas davantage, autrement qu'il mourroit: Je luy demanday pourquoy, il me dit qu'il auoit veu vne lumiere brillâte tourner tout à l'entour du plat: ie voulus mettre la main sur le plat, il s'escria, *Khiganipin, Khiganipin*, tu mourras, tu mourras: Or comme ie commence à cognoistre leurs fantaisies pour luy faire voir sa simplicité: ie prends vne cuillerée ou deux de ce qu'il m'angeoit, & en mangeay moy-mesme, il commence à me regarder comme tout estonné; & voyant que ie n'auois point de mal, i'en m'ageray aussi, fit-il, puis que tu en as mangé.

On dit que quelques Balques ou Anglois leurs ont baillé l'apprehen-

France, en l'année 1633. 101

sion que les François les vouloient empoisonner. C'est pourquoy plusieurs vous inuitent de goustier le premier de ce que vous leur presentez. En quoy il arriua vne chose agreable à vn Sauvage fort adonné à boire: le sieur du Pleffis luy ayāt fait presenter vn verre de vin, ou de sidre; il se tourne, & le donne à vn François pour en taster: ce François le tasta si bien, qu'il n'y laissa rien. Le Sauvage qui le voyoit faire, crioit prou *egoussé*, *egoussé*, c'est assez, c'est assez: mais l'autre tira iusques au bout, puis presenta le verre tout vide au Sauvage, pour l'apprendre vne autre fois à quitter ces deffiances.

Le 22. Nostre Pierre ayant pris vn Castor, vne Sauvage l'ayant écorché, nostre frere le prit & le lueva: ceste femme voyant qu'il faisoit tomber à terre le sang de cet animal, s'écria, en verité cet homme n'a point

d'esprit, & se tournant vers Pierre, luy dit, tu ne prendras plus de Castors, on a respandu le sang du tien, c'est vne de leurs superstitions, qu'il ne faut point respandre à terre le sang pur du Castor, si on veut auoir bonne chasse, du moins Pierre nous le dit ainsi.

Le premier iour d'Auril le Capitaine des Algonquains nous vint voir, & nous apporta de la chair d'Elan, ses gens en auoient tué dix, quoy qu'un Sauvage vous donne pour vn grand mercy, (c'est vn mot qu'ils ont appris des François) il leur faut rendre quelque autre chose pour vn autre grand mercy, autrement vous serez tenu pour vn ingrat. Ils reçoient assez volontiers sans donner: mais ils ne sçauent que c'est de donner sans receuoir. Il est vray que si vous les voulez suiure d'as les bois, ils vous nourriront sans vous rien de-

mander, s'ils croient que vous n'ayez rié: Mais s'ils s'apperçoivent que vous ayez quelque chose, & qu'ils en ayent enuie, ils ne cesseront de vous presser que vous ne leur ayez donné.

Pour retourner à ce Capitaine, ie luy demanday s'il auoit vn fils, & s'il ne vouloit point nous le donner pour l'instruire; il me demanda combien ie voulois d'enfans, & que i'en auois desia deux: ie luy dis qu'avec le téps peustestre i'en nourrirois vingt, il s'étonna: Habilleras-tu bien, me dit-il, tant de mode? Je respondis que nous ne les prendrions pas que nous n'eussions le moyen de les habiller, il repart qu'il seroit bien content de nous donner le sien, mais que sa femme ne le voudroit pas. Les femmes ont icy vn grand pouuoir, qu'un homme vous promette quelque chose, s'il ne tient pas sa promesse, il pense s'estre bien excusé, quand il vous a

dit que sa femme ne l'a pas voulu : ie luy dis donc qu'il estoit le maistre, & qu'en France les femmes ne commandoient point à leurs maris : cela est bien, dit-il, mais pour mon fils ie suis assez sçauant pour l'instruire, ie luy apprédray à haranguer : instruits premierement les Montagnais, si cela reüssit bien, nous te donnerons nos enfans.

Ie luy parlay de Dieu, il m'escou-
toit fort attentiuelement: Ie luy ensei-
gnay quelque petite priere en langa-
ge Montagnais qu'il entend fort
bien; il les prononçoit en sa langue,
& me promit qu'il les diroit souuēt.
Or cōme le téps me pressoit d'aller
reciter mon office, ie luy dis que i'al-
lois prier Dieu, il me suiuit, entra dās
ma chambrette, & s'y tint iusques à
ce que i'eusse acheué, me faisāt après
plusieurs interrogations; bref il ne
s'en retourna qu'à la nuict.

Le 18. & le 20. d'Auril, il tonna fort & ferme avec de grands éclairs, & cependant la riuere estoit encor glacée, & la terre couuerte de neige; ce qui fait voir qu'il y a de la chaleur en l'air, & que ces neiges & froids sont accidentels, & contre la nature du climat no^r sommes paralleles à la Rochelle, cōme i'ay desjà dit. Tous les François pourront tesmoigner qu'ils n'ont point veu dans le cœur de la France mois de May si chaud, que celuy qu'ils ont esprouué à Kebec.

La chaleur est icy grande & brûlante; & cependant i'ay remarqué depuis que ie suis icy qu'il a gelé tous les mois de l'année. Je ne m'estonne point de ces gelées: nous auons du costé du Nord vne chaisne de montagnes peut-estre de cent ou deux cens lieuës d'estendue. Nous ne sommes pas éloignez de six lieuës de ces

monts prodigieux, & peutestre toujours couverts de neiges : Je vous laisse à penser si les vents qui passent par là nous peuvent apporter beaucoup de chaleur. De plus nous sommes dans les bois de 800 ou mille lieuës. Nous habitons les bords de deux fleuves, dont l'un engloutiroit les quatre beaux fleuves de France sans regorger. Voila les vraies causes & alimens du froid. Si le pays estoit decouvert iusques à ces montagnes, nous aurions peutestre l'une des plus fœcondes vallées qui soient en l'univers : L'experience nous fait voir que les bois engendrent les frimas & les gelées. Les terres de ceste famille qui est icy estant plus decouvertes que les nostres, sont plustost déchargées de neiges, & moins sujettes à ces froids du matin. Les nostres aussi ne sentent point ces rigueurs si souvent, que celles de la

maison des R.R. Peres Recolets qui
font plus referrez dans les bois.

Il y a quantité de iours en hyuer
dont l'ardeur du Soleil se fait bien
plus fortement ressentir qu'en Fran-
ce. Le premier iour que ie vey no-
stre riuiere prise, ie m'estonnay, car le
temps estoit fort doux; & cherchant
la raison de cela, celle-cy me vint en
pensée. La riuiere se glace tousiours
sur les bords, & quand la marée viét
à monter, elle détache ces glaces, &
les amaine en haut. Or est-il que nō
pas loin de nous il y a vn fault, ou des
rochers qui empeschent les glaces
& la marée de passer plus outre. Ces
glaces étant donc ramassées &
pressées sur cette riuiere, qui est au
milieu d'un si grand bois, où le froid
& la neige se conseruent aisément:
elles se lient ensemble, & ainsi de
mille & mille glaces, il s'en fait vne
qui se va grossissant tous les iours, &

qui fait vn grand pont sur toute la riuiera. La Lombardien n'est pas loin des Alpes dont le sommet est toujours blanc de neige, & neantmoins ie ne ſçay ſi l'Europe a quelque vallée plus agreable & plus fertile que cette contrée: i'en dy le meſme du lieu que nous habitons ſ'il eſtoit deſerté & cultiué. Voila ma penſée touchant le pays: ſi ie me trompe ce n'eſt pas merueille, cela m'arriue aſſez ſouuent, tout giſt à le deſerter: mais ô mô Dieu, que de peine à purger vne foreſt embarſſée d'arbres tombez! ie dirois volontiers depuis le deluge.

Le 23. du meſme mois d'Auril, nous veſmes partir les glaces, cela eſt effroyable: on m'a dit qu'on en auoit veu paſſer deuant le fort lôgués d'une demie lieuë; ce ſont des ances d'eau glacée que la marée de la grande riuiera va détachant. Sur noſtre

petite riuere les glaces n'y sôt pas si affreuses, & neantmoins ie leur ay veu emporter de gros morceaux de terre, arracher des fouches, briser quelques arbres qu'elles entouroiét. On en voit marcher de tous droits dessus ces glaces au beau milieu de la riuere, qui en vne seule marée paroist aussi belle & aussi claire, comme si elle n'auoit point esté glacée.

Le 7. de May, vn Sauuage estant venu voir la Nasse nostre voisin: cōme ie vey qu'il se portoit mal, ie l'aborday, & luy parlay de Dieu, l'exhortant à auoir recours à luy: il me respondit; Toy, tu cognois Iesus, prie le pour moy, car moy ie ne le cognois point, ie ne cognois que nostre Manitou. Je luy dis qu'il prononçast souuēt de cœur ces paroles, O Iesus qui estes bon, ayez pitie de moy; il mourut quelque temps apres.

Les Montagnais le tenoient pour

l'un de leurs grands forciers, ou consultants de Manitou: ie sçauray quelque iour si vrayement il y a de la diablerie en leur fait, pour le present ie ne puis dire autre chose que les uns disent que ouy, les autres que non: c'est à dire qu'il n'y a rien d'assuré.

I'estois l'an passé maistre de deux escoliers, ie suis deuenu riche, i'en ay maintenant plus de vingt. Après le depart de mon maistre, i'ay recueilly & mis en ordre vne partie de ce qu'il m'auoit enseigné, & que i'auois escrit çà & là, m'accommodant à son humeur, qui souuent ne me dictoit que ce qui luy venoit en fantaisie. Ayant donc rallié la pluspart de mes richesses, ie me suis mis à composer quelque chose sur le Catechisme, ou sur les principes de la foy; & prenant mon papier en main, i'ay commencé à appeller quelques enfans avec vne petite clochette. La premiere

France, en l'année 1633. III

fois i'en auois fix, puis douze, puis quinze, puis vingt; & dauantage ie leur fais dire le *Pater, Ave, & Credo*, en leur langue. ie leur explique grossierement le mystere de la Sainte Trinité, & del'Incarnation; & à tous bouts de champ ie leur demande si ie dis bien, s'ils entendent bien, ils me respondent tous, *eoco, eoco, ninisitoutenan*: ouy, ouy, nous entendons. Ie les interroge par apres s'il y a plusieurs Dieux, & laquelle des trois personnes s'est fait homme: ie forge des mots approchans de leur lague, que ie leur fais entendre. Nous commençons le Catechisme par ceste priere: apres auoir fait le signe de la Croix; *Nouk himami Iesus, iagoua khistinohimao-nitou xhi hitouina caie khiteritamouin. Ca cataouachichien Maria ouccaonia Iesu, ca cataouachichien Ioseph aiamihitouinan. MÓ Seigneur ou Capitaine Iesus; ensei-gnez moy vos paroles & vostre vo-*

lonté ! ô bonne Marie Mere de Dieu ! ô bon Ioseph priez pour nous.

Nous finissons par le *Pater noster* que j'ay composé, quasi en rimes en leur langue, que ie leur fais chanter : & pour derniere conclusion, ie leur fais donner chacun vne escuellée de pois qu'ils mangent de bon appetit : quand ils sont beaucoup, i'en donne seulement à ceux qui ont bien respondu. C'est vn plaisir de les entendre chanter dans les bois ce qu'ils ont appris : les femmes mesme le chantent, & me viennent par fois escouter par la fenestre de ma classe, qui nous sert aussi de reffectoir, de despense, de tout : I'estois prest d'aller par les cabanes assembler tous les enfans, mais la venuë de m^osieur Champlain qui nous a amené du monde, m'occupe pour quelque temps : si tost que ie me seray dégagé de la plus grande presse, ie com-

men-

menceray cét exercice, ie prie Dieu pour lequel ie l'entreprends de le benir.

Mes escoliers me viennent trouver d'une demie lieuë loing pour apprendre ce qui leur est nouveau: il y en a desia quelques-vns qui scauent fort bien qu'il n'y a qu'un Dieu, que Dieu a tout faict, qu'il s'est faict homme pour nous, qu'il luy faut obeïr, & que ceux qui ne croiront pas en luy iront dans les feux, & ceux qui luy obeïront iront dans le ciel.

Quand ie leur parle du Fils de Dieu, ils me demandent si Dieu est marié, puis qu'il a un fils; ce sont les hommes qui font ceste question. Ils s'estonnent quand ie leur dis que Dieu n'est ny homme, ny femme, ils demandent comme il est donc fait: ie responds qu'il n'a ny chair, ny os, qu'il ressemble à l'ame. Il y en eut un qui me fit rire, car il repartit; il est

H

vray , l'ame n'a point d'os , ny de chair , i'ay veu la mienne , elle n'en auoit point ; ie voulus l'instruire là dessus , mais ils n'ont point de paroles pour signifier vne chose puremēt spirituelle , ou s'ils en ont ie ne les scay pas. Ie ne vay encore qu'à tastōs , & ce qui me donne plus de regret ne les pouuant entendre , c'est que ie preuoy bien que mon ignorance fera de longue durée , tāt pour ce qu'ils n'arrestēt point en vn lieu , que pour autant que mes soins vont estre plus partagez qu'ils n'estoient. Dieu pouruoirā à tout , il est plus grand que nostre cœur.

Au reste le fruct qu'on peut recueillir de ceste mission sera grand , s'il plaist à Dieu : Si les Peres qui sont destinez pour les Hurons , natiō stable , peuuent entrer dans le pays ; & que les guerres ne troublent point ces peuples : il est croyable que dans

Une couple d'années, on verra qu'il n'y a nation si barbare qui ne soit capable de recognoistre & honorer son Dieu. On s'estonne que depuis tant d'années qu'on viét en la Nouvelle France, on n'entend rien dire de la conuersion des Sauuages: il faut defricher, labourer, & semer, deuant que de receuillir. Qui des Religieux qui ont esté icy a iamais sçeu parfaitement la langue d'aucune nation de ces contrées? *fides ex auditu*, la foy entre par l'aureille. Comment peut vn muet prescher l'Euangile? Au temps que le Pere Brebeuf commençoit à se faire entendre, la venuë des Anglois le contrainst de quitter ces pauvres peuples, qui luy dirent à son depart: Escoute, Tu nous as dit que tu auois vn Pere au Ciel qui auoit tout fait; & que celuy qui ne luy obeïssoit pas, estoit ietté dans des feux. Nous t'auons demandé d'estre instruits,

& tu t'en vais, que ferons nous? Un Capitaine l'abordant luy dit *Eschom*, ie ne suis pas baptisé, & tu t'en vais, mon ame sera donc perdue? que feray-ie à cela? Tu dis que tu reuiendras; va-t'en donc & prends courage, reuiens deuant que ie meure. Un vieillard d'un autre village que celui ou habitoit le Pere l'entendant parler des choses dernieres, de la recompense des bons, & du chastimēt des meschans, luy dit, *eschom*, les gens de ton village ne vallent rien; voila de meschans hommes, ils ne nous communiquent point ce que tu leur dis: & cependant cela est si important, qu'il en faut parler au Conseil de tout le pays. Sont-ce pas là des indices d'une heureuse moisson? le Diable preuoit bien ce fruit, car de l'heure que ie parle, il fait ce qu'il peut pour empescher la venue des Hurons; & par consequent pour fer-

mer la porte à l'Euangile, & à ceux qui l'annoncent.

Pour ces peuples errants & vagabonds, parmy lesquels Dieu m'a donné mon département, quoy que mes souhaits me fissent pancher du costé des nations stables & permanentes, le fruit sera plus tardif; il viendra neantmoins en son temps, i'y voy de bonnes dispositions. Premièrement la crainte qu'ont les Algonquains de leurs ennemis les Hiroquois, leur fait abandonner leur pays: & comme ils l'aiment naturellement, ils demandent instâment qu'on aille faire vne habitation parmy eux, ayâs dessein de fermer vn bourg à l'entour du fort qu'on dressera là, & de s'y ramasser là dedans: Ce que Messieurs de la Compagnie de cette Nouvelle France auront bien agreable. Secondement qui sçauroit parfaitement leur langue, il seroit tout puissant

parmy eux, ayant tant soit peu d'eloquence. Il n'y a lieu au monde où la Rhetorique soit plus puissante qu'en Canadas: & neantmoins elle n'a point d'autre habit que celuy que la nature luy a baillé: elle est toute nue & toute simple, & cependant elle gouverne tous ces peuples, car leur Capitaine n'est esleu que pour sa langue: & il est autant bien obey, qu'il l'a bien pendue, ils n'ont point d'autres loix que sa parole. Il me semble que Ciceron dit qu'autrefois toutes les nations ont esté vagabondes, & que l'eloquence les a rassemblées: qu'elle a basti des villes & des citez. Si la voix des hommes a tant de pouuoir, la voix de l'esprit de Dieu sera-elle impuissante? Les Sauvages se rendent aisément à la raison, ce n'est pas qu'ils la suivent tousiours, mais ordinairement ils ne repartent rien contre vne raison qui

leur conuainc l'esprit.

Vn Capitaine demandant secours à l'Anglois qui estoit icy pour aller en leurs guerres, l'Anglois voulant esquiuer, le payoit de raisons apparentes: sçauoir est qu'il auoit des malades, que ses gens ne s'accommoderoient pas bien avec les Sauuages. Et ce Capitaine refuta si pertinemment toutes ces defaites, que l'Anglois fut contraint de luy dire; i'ay besoin de mes gens, ie crains que les François ne nous viennent assaillir. Alors le Sauuage luy dit, Tu parle maintenant, nous t'entendons bien iusques icy, tu n'as rié dit: ils acquiescerent à cette raison, quand on leur fera voir la conformité de la loy de Dieu, avec la raison, ie ne croy pas qu'on trouue grande resistance en leur entendement: leur volonté qui est extrêmement volage & changeante, appriuoisee par les graces de

celuy qui les appellera, se rengera en fin à son deuoir. En troisieme lieu, ce peuple peut estre conuerty par des seminaires: mais voicy comment il faut esleuer à Kebec les enfans des Sauvages, qui seront plus haut en ceste autre habitation. On les aura à la fin, ils les donneront s'ils voyent qu'on ne les enuoye point en France. Pour les enfans de ce pais-cy, il les faudra enuoyer là haut: La raison est que les Sauvages empêchent leur instruction, ils ne scauroient supporter qu'on chastie vn enfant, quoy qu'il fasse, ils n'ont qu'une simple reprehension: de plus c'est qu'ils pensent tellement vous obliger en vous donnant leurs enfans pour les instruire, nourrir, & habiller: qu'en outre ils vous demanderont plusieurs choses, & vous seront extrêmement importuns, vous menaçant de retirer leur enfant si

vous ne leur accordez leur demande.

Le 14. de May, ie baptifay le petit Negre, duquel ie fis mention l'an passé: quelques Anglois l'ont amené de l'isle de Madagascar, autrement de Saint Laurens, qui n'est pas loin du Cap de Bonne Esperance, tirant à l'Orient, c'est son pais bien plus chaud que celuy où il est maintenant. Ces Anglois le donnerent au Kers, qui ont tenu Kebec, & l'un des Kers le vendit cinquante escus à ce qu'on m'a dit, à un nommé le Bailly, qui en a fait present à ceste honneste famille qui est icy. Cét enfant est si content que rien plus, il m'a encor bien recreé en l'instruisant: car voulant recognoistre si les habitans de son pais estoient Mahometans, ou Payens; ie luy demandois s'il n'y auoit point de maison en son pais où on priaist Dieu, s'il n'y auoit point de Mosquées, si on n'y parloit point

de Mahomet. Il y a, dit-il, des Mosquées en nostre pais : Sont-elles grandes? luy repartis-je; elles sont, répond-il, comme celles de ce pais-cy. Et luy disant qu'il n'y en auoit point en Frâce, ny en Canada. I'en ay veu, dit-il, entre les mains des François & des Anglois qui en ont porté en nostre pais, & maintenant on s'en sert pour tirer. Je recognus qu'il vouloit dire des mousquets, & non des Mosquées, ie me soufris & luy aussi: il est grandement naïf, & fort attentif à la Messe & au Sermon. C'est le quatriesme que i'ay baptisé depuis mon arriuée; car Dieu ayant donné à Madame Coullart vn petit enfât: ie luy ay administré ce Sacremēt, ce que i'auois desia fait à 2 petits Sauuages.

Le 19. on nous vint apporter nouuelle qu'vn vaisseau Anglois estoit entré à Tadoussac depuis quelques iours: Nous ne sçauions si c'é-

toit vn courrier, ou s'il y auoit quelque trouble entre la France & l'Angleterre; chacun bastissoit sur ses conjectures, & tout le monde se tenoit sur ses gardes. Le Dimanche suiuant, iour de la Sainte Trinite, estant allé dire la Sainte Messe au fort, on me dit que si nous entendions tirer deux coups de canon, que nous nous retirassions promptement avec nos François dans la forteresse.

Le lendemain 22. du mesme mois de May, nous ouïsmes iouer le canon de bon matin, sur l'incertitude de ce que ce pourroit estre.

Le Pere de Nouë prend nostre Sauvage, & s'en va à Kebec; & sans y tarder, nous rapporte nouuelle que le sieur de Champlain estoit arriué: que le Pere Brebeuf s'en venoit incontinent en nostre petite maison. Nous allasmes remercier nostre Seigneur. Cependant voicy le Pere

Brebeuf qui entre, Dieu scait si nous le receufmes & embrassafmes de bô cœur. Quelques Sauvages estâs chez nous, & voyâs nostre ioye à cét heureux rencontre, s'écrierent selô leur coustume quand ils admirèrent quelque chose; *chteé ! chteé !* se resjouiffans avec nous de l'arriuée du Pere, lequel apres auoir salué nostre Seigneur en nostre petite chapelle, nous dit que le pere Masse estoit à Tadoussac, que le Pere Daniel, & le Pere Dauost nous venoient voir du grand Chibou. Il m'apporta si grande quantité de lettres, que ie fus confus voyât le souuenir & tesmoignage d'affection de tant d'honnestes personnes : *Quid retribuam Domino pro omnibus quæ retribuit mihi* : Qu'il soit beny pour vn iamaiss'il veut, en reconoissance de ses bien-faits que nous beuions son calice: *fiat, fiat*, ce nous fera trop d'honneur. Mais ie le prie d'ap-

pliquer en particulier vne seule goutte de celuy qu'il a beu pour ceux qui nous obligent tāt, pour les associez de la Compagnie de cette Nouvelle France, desquels Dieu se veut seruir pour sa gloire, pour V.R. pour toute la Prouince, & pour tous ceux qui cooperent au salut de tant de pauvres ames esgarées : Vne petite gouttelette de ce diuin calice nous enrichira tous: & puis que mes prieres sont trop foibles pour obtenir vn si grand bien, ie supplie V.R. d'interposer les siennes, & celles encore de tant d'ames sainctes qui sont dessous la charge: Mais passons outre.

Ayant sçeu l'arriuée de Monsieur de Champlain, ie l'allay saluer. Arriuant au fort, ie veis vne escoüade de soldats François armez de piques & de mousquets qui s'é approchoiēt tambour battant: si tost qu'ils y furent entrez, Monsieur de Caën re-

mit les clefs du fort entre les mains de Monsieur du Pleffis Bochard, qui les remit le lendemain entre celles de Monsieur de Champlain, pour entrer dans la conduite des vaisseaux, selon l'ordonnance de Monseigneur le Cardinal.

Je remerciay le mieux qu'il me fut possible Monsieur de Champlain de la charité qu'il auoit exercée enuers nos Peres qui a esté tres-grande, comme me témoignoit le Pere Brebeuf.

Le 24. de May, dixhuiet canots de Sauvages estans descendus à Kebec, le sieur de Champlain se doutât qu'ils pourroient passer iusques aux Anglois, qui auoient trois vaisseaux à Tadoussac, & vne barque bié haut dans la riuiere, s'en alla dans les Cabanes de ces Sauvages, & leur fit parler fort à propos par le sieur Oliuier, truchement, honnest homme, & bien propre pour ce

pays-cy. Il leur dit donc par la bouche de cét interprete, que les François les auoient tousiours aimez & defendus, que luy les auoit secourus en personne dans leurs guerres: qu'il auoit grandement chery le Pere du Capitaine auquel il parloit; lequel fut tué à ses costez en vn combat où luy-mesme fut blessé d'un coup de fleche, qu'il estoit homme de parole; que nonobstant les incommoditez des mers, il les estoit reuenu voir comme ses freres: qu'eux ayant desiré & demandé qu'on fit vne habitation de François en leur pays pour les defendre contre les incursions de leurs ennemis, qu'il auoit eu dessein de leur accorder, & que cela seroit desia mis en execution sans le détourbier des Anglois: qu'au reste il estoit pour le present occupé à la reparation des ruines qu'auoient fait ces mauuais hostes: qu'il ne manquera pas de leur

donner contentement si tost qu'il aura pourueu aux affaires plus pressantes; que les Peres (parlant de nous autres) demeureroient parmy eux, & les instruiroient cōme aussi leurs enfans. Cependant, nonobstant les grandes obligations qu'ils auoient aux François, ils estoient descendus en intentiō d'aller voir des voleurs qui venoient pour dérober les François, qu'ils auisassent bien à ce qu'ils feroient que ces voleurs estoient passagers, & que les François demeuroient au pays comme leur appartenant. Voila vne partie du discours que leur fit tenir le sieur de Champlain, autant que i'ay peu sçauoir, par le rapport qui m'en a esté fait par ceux qui estoient présents.

Pendant cette harangue, le Capitaine & ses gens escoutoient fort attentiuelement, luy entr'autres paroissoit profondement pensif, tirant
de

de son estomach cette aspiration de temps en temps, pendant qu'on luy parloit, *hám! hám! hám!* comme approuvant le discours du truchement: lequel estant acheué, ce Capitaine prend la parole pour respódre, mais avec vne rhétorique aussi fine & deliée, qu'il en scauroit sortir de l'escolle d'Aristote, ou de Ciceron. Il gagna au commencement de son discours la bienueillance de tous les François par vne profonde humilité, qui paroissoit avec bonne grace dans ses gestes & dans ses paroles.

Je ne suis, disoit-il, qu'un pauvre petit animal qui va rampant sur la terre: Vous autres François vous estes les grands du monde, qui faites tout trembler. Je ne scay comme j'ose parler deuant de si grands Capitaines: si j'auois quelqu'un derriremoy qui me suggerast ce que ie dois dire, ie parlerois plus hardimét.

Je me trouue estonné, i'en'ay iamais eu d'instruction, mon pere m'a laissé fort ieune, si ie dis quelque chose ie le vais recueillant çà & là à l'aduanture, c'est ce qui me fait trembler.

Tu nous dis que les François nous ont tousiours aimez, nous le scauons bien, & nous mentirions si nous disions le contraire. Tu dis que tu as tousiours esté veritable, aussi t'auons nous tousiours creu. Tu nous as assisté en nos guerres, nous t'en aimons tous dauantage, que veux-tu qu'on responde? tout ce que tu dis est vray.

Tu dis que les François sont venus habiter à Kebec pour nous defendre, & que tu viendras en nostre pays pour nous proteger. Je me souuiens bien d'auoir ouy dire à nos peres que quand vous estiez là bas à Tadoussac, les Montagnais vous allerent voir, & vous inuiterent à nostre deueu de monter çà haut, où nos peres

vous ayant veu, vous aimerent, & vous prierent d'y faire vostre demeure.

Pour l'habitation que tu dis que nous auons demandé aux trois riuieres, ie ne suis qu'un enfant, ie n'ay point de memoire, ie ne scay si ie l'ay demandée : vous autres vous auez vostre Massinahigan, (c'est à dire, vous auez cognoissance de l'escriture,) qui vous fait souuenir de tout : mais quoy que c'en soit, tu seras toujours le bien venu. Remarquez la prudence de cet homme, à faire voir que non seulement les Sauvages, mais encor que les François desirent cette habitatió; il poursuuiuit son discours, disant : Quand tu viendras là haut avec nous, tu trouueras la terre meilleure qu'icy : tu feras au commencement vne maison côme cela pour te loger (il designoit vne petite espace de la main :) c'est à dire tu feras vne

forteresse , puis tu feras vne autre maison comme cela, designant vn grand lieu , & alors nous ne ferons plus des chiens qui couchét dehors: nous entrerons dans cette maison, il entendoit vn bourg fermé : En ce temps-là on ne nous soupçonnera plus d'aller voir ceux qui ne vous aiment pas: tu feras des bleds, nous ferons comme toy , & nous n'irons plus chercher nostre vie dās les bois, nous ne ferons plus errans & vagabonds.

Voila le sieur de Caën qui a creu que i'auois enuoyé des Castors vers les estrangers; i'ay enuoyé vers ce quartier là quelques peaux d'Orignac, non pour traitter , mais pour couper les bras à nos ennemis. Tu scais que les Hiroquois ont de grāds bras, si ie ne leur couppois, il y a long temps que nous serions tous pris: i'en-uoie des presents aux nations qui

leur sont voisines, afin qu'elles ne se ioignent pas avec eux ; ce n'est pas pour offenser les François, mais pour nous conseruer.

Tu dis que nous voulons aller à l'Anglois, ie m'en vay dire à mes gés qu'on n'y aille point : ie te promets que ny moy, ny ceux qui ont de l'esprit n'iront pas : que s'il y a quelque ieune homme qui fasse vn fault iusques là sans estre veu, ie n'y scaurois que faire, tu scais bien qu'on ne peut pas tenir la ieunesse. Ie le defendray à tous, si quelqu'un y va, il n'a point d'esprit: tu peux tout, mets des chaloupes aux auenuës, & prends les Castors de ceux qui iront.

Tu nous dis que les Peres viuront parmy nous, & nous instruiront, ce bon-heur sera pour nos enfans, nous qui sommes desia vieux, nous mourrons ignorans, ce bien n'arriuera pas sitost que nous vou-

driens.

Tu dis que nous prenions garde à ce que nous ferons, tu nous pinse au bras, & nous fremissons: tu nous pinse puis apres au cœur, & tout le corps nous tremble. Nous ne voulós point aller aux Anglois, leur Capitaine a voulu faire alliance avec moy, & me tenir pour son frere, & ie n'ay pas voulu, ie me suis retiré, disant, qu'il estoit trop grand Capitaine. Ie me souuenois bien d'une parole que tu nous auois dit, que tu retournerois: iet'attendois tousiours, tu as esté veritable, tu le feras encore en nous venant voir en nostre pays: ie n'ay qu'une crainte, c'est qu'en ce commerce des François avec nos gens, il n'y ait quelqu'un de tué, & alors nous serions perdus: mais tu scais que tout le monde n'est pas sage, les plus aduisez se tiendront tousiours dans leur devoir.

Voila à peu près la responce de ce Sauvage qui estonna nos François, lesquels m'ont tesmoigné qu'il releuoit sa voix selon les suiets qu'il traitoit, puis la rabbaissoit avec tât d'humilité, & vne posture ou action si soubmise, qu'il gaignoit l'affection de tous ceux qui le regardoient sans l'entendre.

La conclusion fut que le sieur de Champlain leur dit, quād cette grande maison sera faite, alors nos garçons se marieront à vos filles, & nous ne serons plus qu'un peuple: ils se mirēt à rire; repartans: Tu nous dis toujours quelque chose de gaillard pour nous resiouyr, si cela arriuoit nous serions bien-heureux. Ceux qui croient que les Sauvages ont vn esprit de plomb & de terre, cognoistront par ce discours qu'ils ne sont pas si massifs qu'on les pourroit depeindre.

Ce Capitaine nous vint voir quelques iours après en nostre maison, mais ie n'eus pas le loisir de l'entretenir comme ie desirois.

Le 29. le sieur de Champlain vint entendre la Messe en nostre petite chapelle, nous le retinsmes à dîner: de bonne fortune nostre Sauvage nous auoit apporté vn petit morceau d'Ours, nous luy en presentasmes; en ayant gousté il se mit à rire, & me dit si on sçauoit en Frâce que nous mangeons des Ours, on detourneroit la face de nostre haleine, & cependant vous voyez combien la chair en est bonne & delicate.

Après le dîner, j'allay salüer le Capitaine de Nessel d'as son vaisseau, quantité de petits Sauvages me suiuoient. I'en pris seulement six ou sept avec moy, ie les fis chanter leur *Pater* en Sauvage dans le Nauire: nos François y prenoient grand plaisir.

Le bon pour eux fut que le Capitaine de Nesle leur fit donner du Cascaracona, & du toutouch pimi; c'est ainsi qu'ils appellent le biscuit & le fromage. Au depart comme le Capitaine eut fait tirer vn coup de canon par honneur, ces enfans regardoient avec estonnement, & se monstroient si constans, que si on leur vouloit payer leur chanson en mesmemonnoye, ils voudroient gagner leur vie en chantant.

Le dernier iour de May, la Nasse nostre Sauvage nous vint dire qu'un de leurs gens auoit songé qu'il y auroit des François tuez. Or soit que le Diable leur ait donné ce sentimēt, soit que de plusieurs songes il s'en rencontre quelqu'un de veritable parcas fortuit. Quoy que c'en soit, le 2 iour de Iuin les Hiroquois tuerent deux de nos François, & en bleferent quatre autres, dont l'un mou-

rut bien-tost apres: voicy comme ar-
riua ce malheur. Vne barque & vne
chalouppe montoient dans le grand
fleuve de S. Laurens, la chalouppe
passa deuant; & pour aller plus viste,
quelques matelots mirent pied à
terre pour la tirer, avec des amares
ou des cordes: comme ils vindrent à
doubler vne pointe de terre, trente
ou 40 Hiroquois qui estoient en em-
buscade viennent fondre dessus eux,
avec des cris espouuëtables: ils tuent
d'abbord les deux premiers qu'ils
ont à la rencôte à coups de haches:
ils décochent vne gresle de fleches
avec vne telle vistesse & promptitu-
de, que nos François ne scauoient
de quel costé se tourner, n'ayans pas
preueu ce coup là. Ils eurent bien la
hardiesse de vouloir aborder la cha-
louppe avec leurs canots, & n'eust
esté qu'un François les coucha en
iouë avec son harquebuse, & que la

barque qui n'estoit pas loin, équippa
viste vne chalouppe pour venir au
secours, ayât entédu les cris du com-
bat, il est croyable que pas vn n'en
fut échappé. Les Hiroquois voyant
cette harquebuse, & ceste autre cha-
louppe qui venoit au secours, s'en-
fuirent, écorchans au preallable les
testes de ceux qu'ils auoient tuez,
remportans ces peaux par brauade.

Le 8. de Iuin, le Pere Masse arriua
de Tadoussac, il réueilla nostre ioye,
voyant qu'apres auoir esté si long
temps malade sur la mer, il se portoit
bien. Il nous dit que Pierre Pastede-
chouan estoit plus meschant que ia-
mais. Que les Anglois qui estoient à
Tadoussac l'auoient perdu par l'y-
uognerie: O que celuy-là sera cou-
pable deuant Dieu, qui a introduict
l'heresie en ces contrées! Si ce Sau-
uage auoit de l'esprit, estant comme
il est corrompu par ces miserables

heretiques, il feroit vn puissant obstacle à la publication de la foy, encore n'y apportera-il que trop d'empeschement, si Dieu ne luy touche le cœur. Il fait paroistre par ses deportemens qu'il nous estoit donné pour tirer de luy les principes de sa l'ague, & non pas pour le bien de son ame, puis qu'il se bande contre son Dieu & contre la verité.

Il fait icy des chaleurs si violentes en ce mois de Iuin, & vne si grande seicheresse, que ie n'ay rien veu ny senty de semblable en France, tout brusle sur la terre, rien n'aduançe par ce temps-là; & neantmoins il a gelé à glace en vn matin en la maison des Peres Recolets. La nuit fortifiant la fraicheur des bois, cause de ces gelées du matin; nous sommes voisins de cette maison, & cependant cela n'est point arriué chez nous, pource que nous auons vn plus grand air.

Le 16. du mesme mois de Iuin, nous auons rendu l'un de nos petits enfans à sa mere, vostre Reuerencenous ayant mandé qu'il n'y auoit pas encore dequoy establir vn seminaire: & par consequēt n'ayant enuoyé ceux qu'elle destine pour auoir soin d'instruire les enfans que nous aurions peu auoir, craignant d'ailleurs que ceste femme ne retirast son fils en cachette, & s'enfuit dans les bois de peur qu'on ne le fist passer en France: i ay mieux aimé luy rendre franchement, afin de luy donner à cognoistre que si nous tenons des enfans, c'en est point pour les dérober à leurs parēts, ains pour leur propre bien: afin aussi qu'elle dise aux autres Sauuages qu'ils sont bien nourris avec nous, pour les induire à nous donner les leurs quand on aura moyen de les nourrir. Cette pauvre femme me demanda pourquoy ie

luy rendois son fils? & quand elle le rameneroit? Je luy respōdis que depuis la venuë des vaisseaux, ie l'auois tousiours veu en crainte qu'on ne l'enuoyast en France, nonobstāt les assurances que ie luy auois baillé qu'il n'iroit point: & pour luy monstrier que nous estions veritables, cōme aussi pour luy oster toute crainte que nous luy remettions entre les mains: qu'aussi-tost que ie scaurois la langue, & que nous serios bastis, que nous le reprendrions avec plusieurs autres. Au bout du compte la principale raison qui m'a induit à luy rendre, est que i'apprehendois qu'elle ne l'emmenast à nostre desceu: car alors elle eut forgé mille menteries parmy les Sauvages pour se couurir: & comme ie ne scay pas bien la langue, ie n'eusse peu nous iustifier: ce qui auroit induit les Sauvages à nous refuser leurs enfans quand il sera temps

de les demander: ô que c'est vn grand mal de ne pouuoir produire ses raisons! de ne parler qu'en begayant, & par signes!

Le 23. du mesme mois, le sieur du Plessis nous enuoya dire que douze ou quatorze canots de la nation des forciers estoient descendus iusques à Sainte Croix, quinze lieuës ou environ au dessus de kebec, quelques iours auparauant nous en auions veu descendre vne douzaine d'vne autre nation nommée la natiõ d'Iroquet, du nom de leur Capitaine; Dieu soit beny, puis que la crainte des Hiroquois ne les a point empesché de venir. Ces forciers, c'est ainsi que les François appellent ceste natiõ, pour ce qu'elle fait vne particuliere profession de consulter leur Manitou, ou parler au Diable. Ces forciers, dis-ie, sont venus iusques à kebec; l'vn deux regardant fort attentiue-

ment vn petit François qui battoit vn tambour , & s'approchant fort près pour le mieux confiderer, ce petit garçon luy donna vn coup de l'vn de ses bastôs, & le fit saigner par la teste à bon escient; aussi-tost tous ceux de sa nation qui regardoient ce tambour, voyant ce coup, s'offencerent: ils s'en vont trouuer le truchement François, & luy disent: voila l'vn de tes gens qui a blessé l'vn des nostres, tu scais bien nostre coustume, fais nous des presens pour cette blessure. Côme il n'y a point de police parmy les Sauvages, si l'vn d'eux en tuë ou blesse vn autre , s'il peut euader, il en est quitte pour quelques presës qu'il fait aux amis du defunct, ou de l'offensé. Nostre truchement luy repartit, toy-mesme tu scais bien nos façons de faire, quād quelqu'un de nous fait mal, on le chastie: Cét enfant a blessé l'vn de vos gens, il se-
ra tout

ra tout maintenant fouïetté en ta presence. On fait venir le petit garçon ; quand les Sauvages veirent que c'estoit tout de bon qu'on despoüilloit ce petit batteur de Sauvages & de tambour, & que les verges estoient toutes prestes, ils commencerét à prier qu'on luy pardonnast, alleguans que c'estoit vn enfant, qu'il n'auoit point d'esprit, qu'il ne scauoit pas encor ce qu'il faisoit; mais comme on le vouloit chastier à toute force, l'vn d'eux se met tout nud, iette sa robe sur l'enfant, s'écriant à celuy qui le vouloit frapper; touche sur moy, si tu veux, mais tu ne le frapperas point : voila comme le pauvre petit euada. Toutes les nations Sauvages de ces quartiers, & du Brasil, à ce qu'on nous témoigne, ne scauroient chastier ny voir chastier vn enfant: que cela nous donnera de peine dans le dessein que nous

246 *Relation de la Nouvelle*
auons d'instruire la ieunesse!

Le 24. du mesme mois, le Pere Daniel arriuant; nous apporta nouvelle de la venue du Capitaine Morieult, dans le vaisseau duquel il auoit laissé le Pere Dauost à Tadoussac: ayant pris le deuant par le moyen d'une barque qui montoit à Kebec.

Le dernier iour de Iuin, le Truchement François qui a demeuré long temps parmy ces forciers, & qui en est reuenu nouuellement, nous vint voir avec trois Sauvages ses hostes, nous leur donnasmes à manger: Ils recognurent fort bien le Pere Brebeuf, ayant hyuerné avec luy aux Hurons: Nous les menasmes en nostre petite Chappelle, qui a commencé ceste année à s'embellir. L'an passé pour tableau de l'Autel c'estoit vn meschât linceul, & deux petites images de carton: en vn mot il n'y auoit purement que ce qu'il falloit pour

celebrer la Sainte Messe. Or comme on nous a enuoyé ceste année quelques petits ornements, nous l'a-uons embellie le mieux que nous auons peu: ils regardoient tous fort attentiuelement: iettans les yeux sur le ciel de l'Autel, ils veirēt vn S. Esprit figuré par vne colombe, entourée de rayons: ils demanderent si cēt oiseau n'estoit point le tonnerre, car ils croyent, comme ie remarquay l'an passé, que le tonnerre est vn oiseau; & quand ils voyent quelque beau panache, ils demandent si ce ne sont point des plumes du tonnerre.

Ie leur fis demander s'ils feroient bien contens qu'on les allast instruire en leur pays, & qu'on leur donneroit l'explication des images que nous leur faisons voir; ils témoignèrent qu'ils en feroient bien contens.

Le second iour de Iuillet, vn de nos François fut assommé lauant la lessi-

ue en vn ruisseau voisin du fort, on creut que c'estoit quelque Hiroquois; on court, on cherche, on ne trouue rien. Le Pere Brebeuf & le Pere de Noue estoient proche de l'habitation, dans vne cabane de Hurons: ils accoururent au bruit, ils vont voir le pauvre blessé, qui n'a point parlé, & n'a suruescu que deux iours depuis les coups receus: En fin deux Sauvages Montagnais ont donné aduis aux François du meurtrier, qui a esté pris & cōduit au fort; où il a confessé qu'il auoit fait ce meurtre: c'est vn Sauvage de la petite nation. Voicy le suiet qui l'a porté à cette cruauté; Vn sien parent s'en allant à la guerre, luy recommanda de tuer vn certain Sauvage qu'il luy nommoit: ce miserable auoit souuēt tafché de le surprédre, & de le massacrer: mais voyant qu'il n'en pouuoit venir à bout, l'autre se tenant tou-

fiours sur ses gardes: il a deschargé sa cholere sur le premier François qu'il a trouué à l'escart.

Voila comme nos vies sont peu asseurées parmy ces Barbares: mais nous trouuons là dedans vne puissante consolation, qui nous met hors de toute crainte, c'est que mourans de la main des Barbares en venant procurer leur salut, c'est imiter en quelque facon nostre bon Maistre, à qui ceux-là mesme donnerent la mort, auxquels il venoit apporter la vie.

Le 3. du mesme mois, le Pere Dauost arriua de Tadoussac, il fut contrainct de se faire apporter dans vn canot par des Sauuages, voyant que le vaisseau auquel il estoit ne pouuoit monter faute de vent, craignāt d'ailleurs que les Hurons ne descendissent, & ne s'en retournassent sans luy en leur pays. Dieu soit glorifié.

pour iamais, qui nous a rassemblez tous en nostre petite maisonnette, avec vne grande ioye & vn grád de-
fir de luy offrir nos vies pour son ser-
uice.

Le 4. Louys Amantacha Huró qui a esté baptisé en France, & instruit par nos Peres, & qui auroit fait mer-
ueille en son pays s'il n'eut esté pris des Anglois, se vint confesser & communier en nostre petite Chapel-
le. Il y auoit deux iours qu'il estoit descendu à Kebec, nous venant visi-
ter dès le commencement de son ar-
riuée, ie l'inuitay à penser vn petit à sa conscience, il me promit qu'il le feroit, aussi n'y a-il pas manqué.

Le 5. trois Capitaines de diuer-
ses nations nous vindrent voir, nous leur môstrasmes quelques tableaux, taschant de leur faire entendre ce qu'ils representoient, nous les fis-
mes manger, puis ie leur fis present à

chacun d'un chappelet de rassade, ils estoient les plus contens du monde; ie leurs fis le meilleur accueil qui me fut possible, scachant que nos Peres qui vont aux Hurons, deuoient passer par leur pays.

Le 10. on nous donna aduis sur le soir qu'un petit Sauvage estoit malade à la mort; il y auoit vne bonne demi lieue de chemin à faire depuis nostre maison iusques à sa cabane. La nuit approchoit, la mort du dernier François a ietté quelque défiance dans l'esprit des autres, si bien qu'on se tient vn peu sur ses gardes: nonobstant cela, ie ne pouuois permettre que ce pauvre petit fut abandonné: i'auois desir de l'aller baptiser moy-mesme, mais ayant esté indisposé, & ressenty quelques accès de fiéure depuis quelque tēps: nos Peres trouuerent plus à propos que le Pere Brebeuf y allast. Il part

donc avec le Pere de Nouë dans vn canot, ils rencontrèrent vn François auprès des Cabanes, qui leur dit que ces Sauvages ne vouloient point monstrier leur enfant aux François, cela ne les arreste point, ils entrent dans la Cabane, & le Pere Brebeuf qui iargonne aussi bien que moy en Sauvage, leur fit entendre le mieux qu'il pût la cause de sa venue: le Pere de Nouë courut incontinent vers le Truchement, pour le supplier de venir faire vn tour vers ce malade. Comme il est fort honneste homme & bien vertueux, il quitte son soupper, & s'en va à trouuer les Peres, qui le supplient de declarer aux Sauvages pourquoy ils venoient si tard: scauoir est qu'ils aimoient ce petit enfant, & que s'il mourroit sans baptisme, qu'il n'iroit point au Ciel: au contraire si on le baptisoit, qu'il seroit tousiours bien-heureux. Ils demandent en

outre si ses parens ne seroient pas bié
contens qu'on le baptisast : la mere
respond que pour elle qu'elle en
estoit tres-contente, que son mary
estoit yure, & qu'il dormoit dans
vne autre Cabane. Le Pere passe ou-
tre, & demande si au cas qu'il mou-
rut, ils ne voudroiet pas bien l'appor-
ter en nostre maison, pour l'enterrer
en nostre Cimetiere : & s'il retour-
noit en fanté, si elle ne voudroit pas
bien nous le doner pour l'instruire :
elle respond que son fils estoit mort,
& que s'il rechappoit, qu'aussi-tost
qu'il pourroit marcher (car il n'a en-
viron que six mois) qu'elle nous l'a-
meneroit. Vn Sauvage entédāt cela,
courut voir le pere de l'enfant, &
l'éueilla; luy ayant rapporté tout ce
qu'auoient dit les Peres, il respōdit;
encore que ie sois yure, i'entend bié
tout ce que tu dis: va t'en, & dis à ces
Peres qu'ils baptisent mó fils? ie scay

bien qu'ils ne luy feront point de mal; s'il meurt, c'est qu'il est mortel; s'il réchappe, ie leur donneray pour l'instruire. Le Messager rapporta la nouvelle, & le Pere Brebeuf enuoye querir de l'eau à la riuere, cependant le Pere de Nouë & le Truchement se mettent à genoux, recitent l'Hymne *Veni Creator*; & le Pere Brebeuf baptise ce pauvre petit, luy donnant le nom de François, en l'honneur de S. François Xavier: disant aux parens que d'oresnauant il le falloit nommer François, & que s'il mourroit, qu'il iroit tout droit au Ciel, où il seroit à iamais bien-heureux. Ces pauvres gens témoignèrent vn tres-grand contentement, reïterans souvent ce nom François, François: & faisans voir qu'ils auoient pris vn singulier plaisir en cette action. L'vn des Sauvages de la Cabane se mit à dire que si le Sauvage qui a tué le

François dernier mort estoit de leur nation qu'ils auroient prié le Capitaine des François de le faire mourir, voulât dōner vne preuue de l'amour qu'il portoit à tous les François. Enfin les Peres retournerent à dix heures du soir bien ioyeux, & comme ie demandois au Pere Brebeuf s'il n'estoit pas bien content d'auoir si bien conclud la iournée : *he las!* dit-il, ie viendrois tout exprés de France, & trauerserois tout l'Ocean pour gagner vne petite ame à N. Seigneur.

Il m'adiousta que le Pere de l'enfant s'appelloit la Grenouille; alors ie le cognus fort bien, c'est vn Capitaine des Algonquains; il nous est venu voir, ie luy ay quelquefois parlé de Dieu, i'en fais mentiō cy-dessus: c'est luy qui me demandoit combien ie voulois d'enfans, & qui s'estonna quand ie luy repartis que nous en voulions vingt, & bien dauantage

quand nous les pourrions nourrir.

Au reste, c'est chose estrange combien les Sauvages sont addonnés à l'yurongnerie, nonobstât les defenses du sieur de Champlain, il y a toujours quelqu'un qui leur traite, ou vend quelque bouteille en cachette: si bien qu'on ne voit qu'yurongnes hurler parmy eux, se battre & se quereler. Le Truchement m'a dit que les Sauvages de la nation de celuy qui est prisonnier au fort pour auoir tué ce François, luy reprochoiét que c'estoit l'eau de vie, & non ce Sauvage, qui auoit cõmis ce meurtre; voulant dire qu'il estoit yure quand il fit ce coup. Tien ton vin & ton eau de vie en prison, disent-ils, ce sont tes boissõs qui font tout le mal, & non pas nous autres. Ils pensent s'estre bien excusés du mal qu'ils ont fait, quand ils disent qu'ils estoient yures: ie ne voudrois pas les croire aisement

en ce poinct, car ils feignent fort bié cette manie quand ils veulent cou-
rir leur malice.

Pour retourner à cet enfant nou-
uellement baptisé, il mourut le len-
demain au soir: & le iour suiuant le
Pere Brebeuf allant au fort, veit les
Sauuages qui trauersoient le grand
fleuve S. Laurens, pour le porter en
terre à l'autre bord. Je croy qu'ils ne
l'apporterent pas chez nous pour
auoir plus de liberté de faire festin
sur sa fosse, seló leur coustume. Quasi
à mesme temps vn ieune garçon hu-
guenot qui a passé dans les vaisseaux,
& qui deuoit retourner avec eux,
s'est noyé tout deuant le fort, estran-
ge effect de la prouidence & prede-
stination du bon Dieu! *vnus assumetur,
alter relinquetur.*

Le Pere Brebeuf ne laissa point
d'entrer dans la Cabane d'où on
auoit tiré cet enfant mort. Il y en

trouua encor vn autre malade: il parla de le baptiser, sa grand'mere respondit; ie suis contente que tu le baptise, pourueu que tu le guerisse. Le Truchement des Algonquains qui se fait bien entendre des Montagnais se trouuant là, le Pere leur fit vn petit discours du Baptisme, & de ses effects: Vous ne recherchez, leur disoit-il, que le corps, & nous recherchons l'ame, qui est purifiée par ce Sacrement, faisant approprier leurs paroles le mieux qu'il pouuoit à nos mysteres. Le Baptisme guarit tousiours l'ame, ne fait point de mal au corps: ains au contraire luy rend souuent la santé. Ils demanderent combien il falloit d'eau pour baptiser: Le Pere respond qu'on n'auoit point d'esgard à la quantité. La conclusion fut que les parés prirent eux-mesmes l'enfant, & le disposerent pour receuoir cette benediction:

mais le Pere iugeant qu'il n'estoit pas en dâger de mort, ne se voulut point hafter.

Le lendemain no⁹ l'allâmes voir le Pere de Nouë & moy, la crainte que nous auîos qu'il ne mourut sans estre baptisé, nous fit partir par vn temps tout à fait violent: les vents & la pluye sembloient vouloir tout rompre, & tout noyer. Je voulois aussi aller entendre de confession vn Bengalois qui auoit esté blessé, & qui me demandoit: c'est vn ieune homme amené des Indes Orientales, & fait Chrestien en Frâce, qui a hyuerné icy avec nous. Je le veis, & le côsolay le mieux que ie pûs. Pour le petit Sauuage m'estant présenté à l'une des portes de la Cabane, on me dit *aouessé*, retire toy: mais ayans ouy ma voix, ils me dirent que ie passasse par l'autre porte: j'entre donc pendant que le Pere de Nouë cherchoit le

Truchement. Vne femme m'arresta au premier pas, me disant, *appitou*, fieds toy là. Je luy responds, ouy, ie veux voir l'enfant. attend, attend, me dit-elle, tu le verras. Le plus grand forcier d'entr'eux, à ce que me dit le Truchement, qui arriua bien-tost apres, chantoit & souffloit cet enfant pour le guerir. Ils auoient fait vn petit retrenchement où estoit l'enfant, i'en voulus deux ou trois fois approcher, mais on ne me le voulut pas permettre. Les Sauvages m'arrestoient à tous coups. Attendant que ce beau medecin eut traité son malade, l'enfant estoit nud comme la main, couché dans vn petit berceau d'écorce, sur de la poudre de bois pourry. Il auoit vne grosse fièvre qui le brusloit, & ce charlatan pour le guerir battoit & tournoit vn instrument remply de petites pierres, fait iustement comme vn tambour de Basque:

Basque. Il chantoir avec cela à gorge desployée: en vn mot luy & sô compagnon pour oster la fieure a ce petit garçon faisoient vn bruit capable de la donner à vn hōme bié sain. Le forcier s'approchoit du malade, le souffloit par tout le corps, à ce que ie pouuois coniecturer, car ie ne le voiois pas, mais i'entendois son souffle tiré du profond de l'estomach: il battoit ce tambour à ses oreilles, cependant il y auoit vn grand silence parmy les autres Sauuages qui estoient dans la mesme cabane. Sa medecine donnée il m'appelle, & me dit que ie vissel'enfant, & que ie luy en disse mon aduis: pour luy qu'il croioit qu'il auoit ie ne sçay quoy de noir dans le corps, & que c'estoit cela qui le faisoit malade, voila le resultat de ce grād bruit. Ie m'approche, ie touche le poulx de l'enfant, ie luy trouuē vne grosse fieure, & leurs dy qu'il auoit vne ma-

ladie que nous appellions la fieure, & qu'il le falloit laisser reposer, & non pas le tuer avec ce grand bruit qui augmentoit sa maladie, & que depuis peu i'auois eu quelques accès de fieure, & que le repos m'auoit guery. Le forcier me repart, cela est bon pour vous autres, mais pour nous c'est ainsi que nous guerissons les malades. Hélas que les hommes qui ne cognoissent pas Dieu sont ignorans, voire mesme dans les choses naturelles ! Pour cōclure ce point, nous nous en retournâmes par eau comme nous estions venus, sans baptiser l'enfant, ne iugeant pas sa maladie mortelle, la fiebure quoy que bien grande eust été intermittente.

A quelques iours de là ie le retournay voir, les parents nous ayans signifié qu'ils estoient bien aises que nous y allâssions, i'y rencontrayencor vn forcier qui le souffloit, mais

celuy cy n'entendoit pas si bien son mestier que l'autre, aussi est il plus jeune: il me laissa voir ses beaux mysteres, il battoit son tambour aux oreilles de ce pauvre petit qui s'égorgeoit de pleurer, il luy souffloit sur la teste avec vn sifflement qu'il faisoit bruire entre ses dents: il tournoit son tambour deçà delà à ses costés, derrière son dos, puis le ramenoit sur l'enfant; En vn mot il se tuoit de bien faire, & ne faisoit rien qui vaille. Il n'entendoit rien à faire le iongleur à comparaison de l'autre. C'est chose estrange que les Sauuages aient tât de creance à ces charlatans! ie ne sçay comme le mensonge est plus adoré que la verité! Bref ce petit enfant se guerissant, son pere & sa mere nous sont venus voir, & l'ot apporté avec eux, nous remercians par cette visite de la peine que nous auions pris pour luy.

I'en ay esté voir d'autres depuis au delà du grand fleuve Saint Laurens, où vne partie des Sauvages s'estoient cabanés. Si ie continuë cet exercice les meres me tiendront bié tost pour medecin des petits enfans, car elles me disent desia leurs maladies, mais nous sommes appointés bien contraires : ils pensent seulement aux corps, & nous à l'ame.

Le 27 de Juillet Louys de Sainte foy surnommé des Sauvages Aman-tacha, duquel i'ay parlé cy dessus, retourna vers le sieur de Champlain qui l'auoit enuoïé au deuant de la grosse troupe de Hurons qu'on attendoit de iour en iour: il en estoit desia venu quelques canots en diuersiours tantost sept ou huit, & tantost dix ou douze à la fois, mais en fin le 28. de Juillet il en est arriué cent quarante ou enuiron tout à la fois qui portoient bié cinq cens Hurons, d'autre disant

700 avec leurs marchadises. Les Sauvages de l'Isle & les Algóquains qui sont deux nations qu'on rencontre venant des Hurons à Kebec, les a-
voient voulu dissuader de venir ius-
ques aux François, disans qu'on leur
oueroit vn mauvais party à cause de
la mort d'un nommé Brulé qu'ils
auoient tué, & qu'un Algonquain de
la petite nation aiant tué vn Fran-
çois, on l'auoit pris prisonnier, &
que c'estoit fait de sa vie, qu'on en fe-
roit autant à quelque Huron. Leur
dessein estoit de tirer toute la mar-
chandise de ces Hurons à tres-bas
pris pour la venir par apres traiter
eux mesmes soit aux François, soit
aux Anglois. Louys Amantacha se
rencontrant là dessus assura ceux de
sa nation de la bienueillance des Frá-
çois, protestant qu'il estoit content
qu'on le mit à mort au cas que les
François ne leurs fissent vn tres-bon

accueil. Que pour Brulé qui auoit esté massacré, on ne le tenoit point pour François, puis qu'il auoit quitté sa nation pour se mettre au service de l'Anglois. Enfin il a si bien fait que six ou sept cens Hurons sont venus iusques à Kebec: vn plus grand nombre s'estoit mis en chemin, mais les vns s'en sont retournés pour la peur qu'on leur donnoit, les autres pour auoir ioué & perdu leurs marchandises, car les Sauvages sont grands ioueurs, & quelques vns d'entre eux ne viennent a la traite avec les François que pour iouer, d'autres pour voir, quelques vns pour dérober, & les plus sages & les plus riches pour trafiquer. Je ne croy pas qu'il y ait nation soubs le ciel plus portée au larcin que la Huronne, il faut tousiours auoir les yeux sur leurs pieds & sur leurs mains quand ils entrent en quelque endroit. On dit qu'ils dérobent

des pieds aussi bien que des mains. I'en regardois vn chés nous quiauoit ietté les yeux sur vn des outils de la menuiserie de nostre frere, la pensée me venant qu'il s'en pourroit saisir, ie le veillay tant que ie peu, mais il fut plus adroit à prendre que moy à regarder. Il cache l'outil si dextrement que ie ne luy vy faire aucune action. Voiant neantmoins la place vuide ie me doubtay de ce qui estoit, i'en donnay aduis au Pere Brebeuf qui entend assés bien leur langue: il accoste mon homme qui voulut nier le fait au commencement, mais enfin il cōfesse la debte, rend son larcin en riant, tant il estoit contrit de son péché. Le Pere de Nouë en surprit vn autre qui enleuoit vn petit morceau de fer blanc qui seruoit d'aiguille à vn meschant quadran que i'ay tracé, vn autre déroba vne lettre par la fenestre de la chambre du Pere Masse.

prendre & n'estre point decouuert estant vne marque d'esprit parmy eux. L'vtilité n'est pas tousiours le seul obiet de leur larcin. Vn François aiant ouy dire que les Sauuages de cette nation estoient grands larrons, se moqua de leur subtilité, disant qu'il leur donnoit tout ce qu'ils luy prendroient: quelques vns l'allerent voir, il leur presenta à boire, pour toutes actions de graces ils luy enleuerent sa tace, mais si finement qu'il ne s'en prit point garde qu'ils ne fussent partis.

Je ne scaurois dire comme cette nation porte les cheueux, chacū suit sa fantaisie: les vns les ont longs & pendans d'un costé comme les femmes, & courts & retroussés de l'autre, si bien qu'ils ont vne oreille cachée, & l'autre descouuerte. Quelquesvns sont iustement rasez à l'endroit où les autres portent vne lon-

gue moustache. I'en ay veu qui auoient vne grande raze toute rasée, qui leur trauersoit toute la teste, passant par le sommet & venant rendre au milieu du front: d'autres portent au mesme endroit comme vne queue de cheueux qui paroist releuée à cause qu'ils se rasent de part & d'autre de cette queue. O que l'esprit des hommes est foible! Il y a plus de quatre mille ans qu'ils cherchent à s'embellir & à s'orner, & toutes les nations de la terre n'ont peu encore conuenir au point de la beauté & de l'ornement.

Le 29 du mesme mois de Iuillet ayant appris que les Hurons deuoyent tenir conseil où il se debuoit agir de nos Peres qui sont destinez pour leur pais, nous les allasmes voir le Pere Brebeuf & moy. Je trouuay Louys Amantacha au fort, ie m'entretins avec luy de choses bonnes: & passant

de discours en discours, il me témoigna qu'il estoit trescontêt de ce que nos Peres alloient secourir sa natio. Il s'est employé pour trouuer qui les embarquast, ou plustôt pour les choisir; car vn grand nombre s'offroit au Pere Brebeuf, luy-mesme en vouloit prendre vn avec soy. Il nous promet merueille, & pour tesmoigner le sentiment qu'il a du secours que Vost. Reu. enuoye aux Hurons ses compatriotes, il luy rescrit de sa propre main, m'assurant qu'il retournera l'an qui vient à Kebec pour mener en son pais les autres Peres qu'il y enuoyera. C'est trop peu (dit-il) de trois Religieux pour tant de milles ames qui se trouuent parmy nous. Il me demandoit vn liuret d'images des mysteres de nostre Foy, pour les faire voir à ceux de sa nation, à fin de prendre de là occasion de les instruire: mais comme i'en auois point, il

me dit qu'il en escriroit au sieur le Maistre. I'ay mis les lettres qu'il enuoye à V. R. avec celles cy, ie prie Dieu qu'elle les reçoie toutes. Je croy que ce ieune homme luy est bié cogneu: il a esté conduit en France par nos Peres, baptisé à Rouën par leur entremise: Monsieur le Duc de Longueuille fut son parain, & Madame de Villars sa maraine: il demoura entre les mains des Anglois par la prise qu'ils firent de la flotte Françoise & de tout ce pais cy: il estoit si bien instruit, que l'un des Capitaines nommez Kers, peu affectionné à nostre Compagnie, comme estant heretique, témoigna publicquemēt qu'il appartenoit aux Iesuites de bié eslever les enfans voyant les deportemens de ce ieune Sauvage. Le sieur Oliuier Truchement des François m'a rapporté cecy cōme l'ayant ouy de la bouche mesme de ce Capitaine

Huguenot. Depuis cette prise ce pauvre ieune homme a esté quelque temps avec les Anglois, & puis avec les Sauuages de sa natió. Dieu vueille que la cognoissance de leur heresie & de leurs vices (car il auoué que les Anglois sont dissolus iusques au dernier point) n'empesche pas que la premiere semence qu'on a iettée dás son ame ne produise les fruits que le Ciel attend, & que nous esperons. Mais venons au Conseil de sa natió. Estant assemblé, le sieur de Cháplain nous fit appeller. I'ay appris que Louís XI tint vn iour son conseil de guerre en la campagne, n'ayant pour throsne ou pour chaire qu'une piece de bois, ou vn arbre abbattu qu'il récontra par fortune au milieu d'un champ. Voila le portraict du conseil des Hurons, excepté qu'ils sont assis encore vn peu plus bas, c'est à dire à platte terre, tous pesse-meslez sans

aucun ordre, sinon que ceux d'une nation ou village se mettent les uns pres des autres pendant qu'on dispute en France de la preface, & qu'on s'amuse à presenter une chaire à celui qu'on iugeroit impertinent de l'accepter, on auroit acheué, & conclu trois cōseils parmy les Sauvages, qui au bout du conte ne laissent point d'estre fort graues, & serieux dans leurs harangues assez longues : ils estoient environ soixante hommes en leur assemblée sans conter la jeunesse qui estoit esparse çà & là. Chaque un s'estant placé le mieux qu'il pût, vn Capitaine commença sa harangue, le sommaire estoit que la nation des Hurons, des Ours & autres estoient assemblées pour tenir cōseil avec les François. Sa harangue finie tous les Sauvages pour approbation de ce discours tirerent du profond de l'estomach ceste aspiration, *ho, ho, oh, re-*

leuant fort la derniere syllabe. Ceste harangue finie, & le conseil declare legitimemēt assemblé par cette belle approbation, le mesme Capitaine en recommença vne autre, qui ne vouloit dire autre chose sinon qu'ils estoient venus voir leurs amis & leurs freres les François, & pour affermir ceste amitié & alliance, qu'ils offroient tous des presens à leur capitaine le Sieur de Champlain, & là dessus luy presenterent trois paquets de robbes de castor. La conclusion fut que tous les Sauvages approuuerent ceste harangue par leur aspiratiō de ho! ho! reiterée, & les François par l'acceptation des presens qu'on offroit. Le mesme capitaine poursuivant son discours, disant que tous ces peuples se resiouissoient du retour du Sieur de Champlain, & qu'ils se venoyent tous chauffer à son feu: le bois qu'ils y mirent furent encore

deux ou trois paquets de robbes de castor dont ils luy firent present. Sur l'heure mesme ce troisieme discours fut approuué comme le second.

Là dessus le sieur de Champlain prit la parolle, & leur fit dire qu'il les auoit tousiours aimés, qu'il desiroit grandement de les voir comme ses freres, & qu'ayant esté enuoie de la part de nostre grand Roy pour les proteger, qu'il le feroit tres-volontiers: qu'il auoit enuoie au deuant d'eux vne barque & vne chalouppe, & que les Hiroquois auoient tué trois de nos homes en trahison, que cela ne luy faisoit point perdre cœur, que les François ne craignoient rien, & qu'ils cherissoient grandement leurs amis: qu'ils ne creussent point ceux qui les voudroient diuertir de les venir voir, & que leur ayant donné leur parolle ils estoient veritables ainsi, qu'ils l'a-

uoient peu remarquer par le passé qu'il recognoissoit encor les vieillards de leur nation pour auoir esté à la guerre avec eux: qu'il les remercioit de leurs presens, & qu'il sçauroit bien les recognoistre. Il adiousta que nos Peres les alloient voir en leur país en témoignage de l'affectiō que nous leur portions, disant des merueilles en nostre faueur. Ce sont nos Peres, leur disoit il, nous les aimons plus que nos enfans & que nous mesmes: on fait grand estat d'eux en France, ce n'est point la faim ny la disette qui les amene en ce país cy; ils ne vous vont pas voir pour vos biens ny pour vos pelletteries. Voicy Louis Amantacha de vostre nation, qui les cognoist, & qui sçait biē que ie dy vray: si vous aimez les François comme vous dites, aimez ces Peres, honorez les, ils vous enseigneront le chemin du ciel, c'est ce qui leur fait
quitter

quitter leur pais & leurs amis & leurs commodités pour vous instruire, & notamment pour enseigner à vos enfans vne si grande science & si necessaire.

Deux Capitaines haranguerent aprescela, ce fut à qui honoreroit le plus le sieur de Champlain & les François, & à qui nous tesmoigneroit de l'affection: l'un d'eux disoit que les François n'estans plus icy la terre n'estoit plus terre, la riuieren'estoit pl^r riuere, le ciel n'estoit pl^r ciel: mais qu'au retour du sieur de Champlain tout estoit retourné à son estre, la terre estoit deuenüe terre, la riuere estoit deuenue riuere, & le ciel auoit paru ciel. L'autre confessoit que les Sauvages estoient tous craintifs & paoureux, mais que le sieur de Champlain estoit effroiabable en ses regards; qu'estant en guerre il iettoit d'vne œillade la terreur dans le cœur de ses

ennemis: & apostrophant la ieunesse de son païs il luy disoit: Prenez garde maintenant, escoutez ce qu'on nous dit: ne dites pas qu'on n'a point parlé de tout cecy en plein conseil: ie vous aduertis, afin que par apres vo⁹ obeyssiez.

La conclusion du conseil fut que le Pere Brebeuf leur dit en leur langue que nous allions avec eux pour y viure & mourir: qu'ils seroyent nos freres, que dorefnauant nous serions de leur nation: & que si nos Peres ne demeuroyent point dans tous leurs villages, ce n'estoit point qu'ils n'aimassent toute la nation, mais qu'ils ne pouuoient pas habiter en tant de lieux, estans vn si petit nombre: que le temps viendrait que nos freres nous viendroyent secourir, & que nous serions en chacune de leurs demeures: que nous leur enseignerions le moyē d'estre à iamais bien-heureux Louys

Amantacha confirma tout cecy, & tous les Sauvages à leurs accoustumées tesmoignerent leur contentement par leur profonde aspiration ho ho ho oh ! Puis entourant le Pere Brebeuf, c'estoit à qui l'embarqueroit, les vns me venoient prendre & me toucher en la main, & se disoient l'un l'autre, regarde comme ils se ressembtent, parlans du Pere & de moy, ce sont deux freres: bref les hommes du village où auoient demeuré nos Peres s'adressans au Pere Brebeuf luy dirent, ouure nous tó cœur, ne cache, rien où veux tu demeurer en nostre pais ? Veux tu estre dans nos Cabanes, ou en auoir vne à part ? L'en veux auoir vne à part, dit le Pere. Hé bien repartent ils, nous irons tous nous cabaner à l'entour de toy, nous nous sommes separés, & auons rompu nostre village à la mort du François qui a esté tué en nostre pays :

chacun s'en est allé qui deçà qui delà. Si tost que tu auras pris place, nous reuiendrons tous avec toy, & tu nous defendras; car que ferions nous sans toy? Voila comme nos Peres estoient aimez de ce pauvre peuple. O que ie dirois volôtiers mes sentimens voient ces pauvres barbares caresser avec tant d'amour ceux qu'ils ne cognoissent pas! O s'ils penetroyent dans les desseins que nous auons! Que Dieu soit beny pour iamais, ie le supplie de leur ouurir le cœur: pour moy i'espere que si vn seul village se conuertit, le feu ne tardera point d'en brusler beaucoup d'autres, & que les nations voisines qui sont fort peuplées, se voudront chauffer aussi bien que les Hurons à ce diuin brasier.

Le dernier de Iuillet iour de feste de nostre S. Pere Ignace, le Sieur de Champlain & les capitaines des vaisseaux qui estoient icy estans venus

gagner les Indulgences en nostre petite Chapelle, quantité de Hurons nous venans voir, nous fumes contraincts de fermer nostre porte, & de leur dire qu'on faisoit festin, afin de les empêcher d'entrer. C'est vne maxime entr'eux qu'ils ne mettront jamais le pied dans la cabane de celuy qui fait festin: il n'y a que les conuiez à qui cela soit loisible. Or neantmoins comme ils desiroient de voir, l'un d'eux ayant mis la teste à vne fenestre appella ses compagnons, & le sieur de Champlain prenant plaisir à les voir admirer, donna à l'un d'eux vn morceau d'écorce de citron, il en gousté, & commence à s'escrier ô que cela est bon! Il en depart à ceux qui estoient avec luy qui furent saisis de la mesme admiration: ils demanderent ce que c'estoit, le sieur de Champlain leur dit en riant, que c'estoit de l'écorce des citrouilles de

France, les voila bien estonnés, & cōmencēt à se dire les vns aux autres, que nos citrouilles estoient admirables : là dessus ceux qui n'en auoient point gousté se mettent à la fenestre, & demandent au sieur de Chāplain si toutes les citrouilles estoient mangées, & qu'ils voudroient bien en taster, pour en porter les nouuelles en leur païs. Je vous laisse à penser si tous ceux qui estoient dans la chambre se mirent à rire. On les fit entrer apres les Vespres dans la Chappelle qui estoit gentiment ornée selon nos petites richesses, ce nous est vn contentement bien sensible de voir que nostre Seigneur ait vne petite maison au milieu des grands bois que nous habitons: c'est icy qu'ils furent estonnés tout a fait: nous auions mis les Images de S. Ignace, & de S. Xauier sur nostre autel, ils les regardoient avec estonnement: ils croyoient que

ce fussent personnes viuentes, ils demandoient si c'estoyent des Ondaqui: le mot *Oqui* & au pluriel *Ondaqui* signifie entre eux quelque diuinité, en vn mot ce qu'ils recognoissent par dessus la nature humaine: ils demandoient encor si le tabernacle estoit leur maison, & si ces *Ondaqui* s'habilloient des ornemens qu'ils voyoient à l'étour de l'Autel. Le Pere Brebeuf leur ayant expliqué ce que representoient ces Images, ils mettoient la main à la bouche, & se la frapportoient en signe d'estonnement; Il y auoit trois Images de la Vierge, en diuers endroits: ils demanderent successiuement de l'une apres l'autre qui c'estoit: le Pere leur disant à toutes que c'estoit la mere de celuy qui a tout fait, ils se mirent à rire, demandans comment cela se pouuoit faire qu'une seule persóne eut trois meres: car ils prenoient ces trois figures

pour la representation de trois personnes differentes, on leur fit entendre que ces trois images figuroient la mesme persõne. ô qu'il seroit bon d'avoir tous les mysteres de nostre foy bien figures! ces images aident grandement, & parlent desia d'elles mesmes.

Sur le soir le Pere Brebeuf estant allé a Kebec ou au fort des François où estoient les Hurons pour voir ceux avec lesquels nos Peres s'embarqueroient, le Capitaine de la Rochelle (c'est ainsi que nos François ont appelé l'un de leurs villages ou Bourgades) donans les noms des villes de France à ces pauvres bicoques. Ce Capitaine donc aborde le Pere Brebeuf, & s'efforce de luy persuader qu'il aille demeurer en sa bourgade se presentant pour l'embarquer ou tout autre qu'il voudra, viés disoit il, avec moy, tu seras assuré parmy nous,

on ne te dérobera point, ie soustiens tout le pays sur mes espauls, ie te protegeray, nous t'aimōs tous, tu ne manqueras de rien, nostre pays est le meilleur entre les Hurons. Le Pere s'arrestāt vn petittsās respōdre. Ie voy bien, dit il, que tu crains d'offenser ceux du village où tu as demeuré qui te veulent auoir, tu es maistre de tes actions, dy leur que tu veux venir avec nous, & ils ne te diront plus riē.

Le pere prent delay pour y penser. Nous aiant communiqué cette emulation entre les villages qui vouloient tous auoir nos Peres, ie luy dy qu'il me sembloit qu'ils deuoient imiter S. Pierre & S. Paul qui s'en allerent attaquer l'idolatrie dans la principale ville du monde, & ainsi que la Bourgade la plus renommée entre les Hurons deuoit estre le lieu de leur demeure: car celle cy faisant ioug à la loy de Dieu, toutes les au-

tres s'y soubmettroient aisement. Le voila donc deliberé de demeurer dás la Rochelle, cette bourgade estant l'une des plus grandes, & des plus peuplées de cette nation, veu mesme que c'est là où les Conseils de tout le país se concluent en dernier ressort: le mal estoit qu'il n'osoit declarer sa volóte, de peur d'écourir la disgrace des autres Bourgades. Il s'aduisa de prier le sieur de Champlain de tesmoigner à tous les Capitaines que sa volóte estoit que tous les François allassent demeurer à la Rochelle, ce qu'il fit. ces Capitaines demanderent pourquoy les autres villages seroient priués de ce bien, & puis que six François alloient là, qu'il les falloir loger en six villages ou bourgades. Non pas, dit le sieur de Champlain, ie desire qu'ils soient tous ensemble, pour deux raisons (remarqués qu'il faut payer ces peuples de raison pour cal-

mer leur esprit) I'enuoye, ce dit-il, deux petits garçons & vn ieune homme avec les Peres: s'ils sont separez, ils feront peut estre des querelles avec vos gens, car ils n'aurot personne qui les gouerne: de plus, si nos François sont dispersez, ils s'en iront où ils voudront, & si quelqu'un des autres François ou de vous autres desire de luy parler, on ne scaura où il est: mais s'ils demeurent tous ensemble, ceux qui demeureront à la maison scauront le lieu où se feront transporter ceux qui en sortiront. Ayez vn peu de patience, & vous aurez tous des François en vos bourgades. Les voilà donc tous contents, horsmis le capitaine du village où le Pere Brebeuf & le Pere de Nouë auoyent demeuré; car il s'attendoit qu'on retourneroit là pour reestabli ce village, qui s'est dispersé. Voilà donc le lieu de la demeure de nos

Peres arrestée, reste à voir qui les embarquera. Pour euitier toute enuie, le Pere Brebeuf fit assembler les capitaines, & les plus âgez d'entr'eux en conseil. Ce capitaine mescontent ne s'y trouua point, ains reprocha au capitaine de la Rochelle qu'il estoit cause que les François n'alloyét point en son village. Celuy-cy se purge le mieux qu'il peut, disant que c'estoit le Sieur de Champlain qui auoit désiré cela: au reste, pour ne point choquer cet homme fasché, il s'excusa d'embarquer l'un de nos Peres, disant qu'il n'auoit dans son canot que de la ieunesse qui n'estoit pas propre à ramer, mais que nous ne trouuerions que trop de personnes qui n'porteroient. Nos Peres auoyent bien desir d'estre embarquez dans les canots d'un mesme village, mais il fut arresté dans leur conseil qu'il falloit donner ce contentement aux

autres villages, d'en passer quelque ũ
iusques dans le pays: & ainſi nos Pe-
res deuoyent eſtre portez en diuers
villages, pour ſe rasſembler par
apres dans la Rochelle.

Le premier iour d'Aouſt les Hurōs
venoyent voir noſtre Chapelle en
ayant ouy parler à ceux qui l'auoient
veue, & ie croy que ſ'ils faiſoyēt quel-
que ſeiour à Kebec qu'il n'y en a pas
vn qui ne la vint viſiter. Leur foire
eſt bien toſt faiçte. Le premier iour
qu'ils arriuent ils font leur cabane, le
ſecond ils tiennent leurs conſeils, &
font leurs preſents; le troiſieſme &
quatrieſme ils traittent, ils vendent,
ils achèptent, ils troquent leurs pel-
leteries & leur petun contre des cou-
uertes, des haches, des chaudieres,
des capots, des fers de flêches, des pe-
tits canons de verre, des chemiſes, &
choſes ſemblables. C'eſt vn plaſir de
les voir pèdant cette traite, laquelle

estant finie ils prennent encore vn iour pour leur dernier conseil, pour le festin qu'on leur fait ordinairement, & pour danser, & puis le lendemain de grand matin ils passent comme vne volée d'oiseaux. Or ceux qui auoient debité leur marchandise de bonne heure venoyent voir nostre maison, allechez par le recit qu'on leur faisoit de la beauté de nostre Chapelle. Le Pere Brebeuf les entretenoit: & comme il eut parlé du Paradis & de l'Enfer à l'une de leurs bandes, l'un d'eux l'arreste, & luy dict: Et que ferons nous, *Eschom*, (c'est le nom qu'ils donnēt au Pere) afin que nous n'allions point dans ces grands tourmens? Le Pere leur ayant dit ce qu'il falloit faire, ils tesmoignerent qu'ils estoient prests d'obeir. Il leur dit que cette Chapelle estoit le lieu où nous prions le grād Dieu du ciel, & qu'ils se missent tous à genoux, &

qu'ils luy fissent leurs prieres en leur cœur. Le les vey tous s'y mettre les vns apres les autres, ou plustost s'accroupir deuant l'autel, car ils ne sçauent que c'est de s'agenouiller, ce n'est point l'une de leurs postures.

Leur oraison faicte, qui ne fut pas longue, le Pere demanda à l'un d'eux ce qu'il auoit dict à ce grand Dieu: Il repart: Ie luy ay dict, Prends courage à nous aider & à nous secourir, & à nous donner vn bô voyage: Voila la priere de ce pauvre barbare. Pendant que l'un d'eux prioit, vn autre luy dit: Regarde bien en ton cœur ce que tu diras à ce grand Maistre. O que ne sçauons nous les langues de ces pauvres Sauuages! Ce sera quand il plaira à Nostre Seigneur: Que son sainct nom soit beni pour vn iamaïs.

Le 3 du mesme mois d'Aoust le Sieur de Champlain festina tous les

Hurons. Les mets du festin furent de la sagamité composée de pois, de pain esmié ou de galette puluerisée, & de pruneaux, tout cela bouilly dans vne grande chaudiere dont on se sert pour faire de la biere, avec de l'eausás sel, leur a semblé tres-excellente. Je ne declareray point les particularitez de ce banquet, ny de leur chant & de leur danse: ce sera pour vne autre fois.

Le 4 on tint encore vn conseil: i'y assistay avec le P. Brebeuf, car on debuoit parler de l'embarquement de nos Peres. Le Sieur de Châplain fit ses presens, qui correspondoient en valeur à ceux que les Hurons luy auoyent faict. Recevoir des presens des Sauvages, cest s'engager à rendre le reciproque. On parla de plusieurs choses en ce conseil, entr'autres les Hurons demanderent l'essargissement du prisonnier Sauvage qui
a tué

a tué nouvellement vn François, comme j'ay remarqué cy dessus. Le sieur de Champlain fit merueille sur ce poinct, pour faire voir aux Hurons qu'il n'estoit pas à propos de le mettre en liberté; & qu'ayant tué vn François qui ne luy auoit fait aucun tort, il meritoit la mort. Les Hurons furent satisfaits des raisons qu'on leur apporta. On parla encore de l'amitié contractée entr'eux & les François, & que nos Peres allans en leur pais confirmeroyent puissamment cette amitié. Les Hurons estoient les plus contents du monde: ceux qui deuoient embarquer & conduire nos Peres auoyent desia receu le loyer de leur peine future, nous leur auions mis entre les mains leurs paquets ou leur petit bagage: nous estions allé coucher au magasin le Pere de Nouë & moy avec nos trois Peres, pour les voir monter le lendemain de grand

matin dans leurs petits canots , & leur dire le dernier adieu, quand tout à coup nostre ioye fut changée en tristesse. Sur les dix ou onze heures du soir vn Sauvage borgne de la nation de l'Isle grandement allié de la nation du prisonnier s'en alla crier par les cabannes de tous les Sauvages qu'on se donnaft bien garde d'ēbarquer aucun François, & que les parens du prisonnier estoient aux aguets sur la riuere pour tuer les François s'ils les pouuoient attrapper au passage. Le Dimanche precedent ceux de la nation de ce prisonnier auoyent tenu conseil avec les capitaines des Montagnais, des Sauvages de l'isle, & des Hurons, pour voir comme ils pourroyent impetrer la grace de ce prisonnier. Les Hurons furent suppliez de la demander, estans esconduits ce Sauvage de l'Isle allié de la nation de l'homicide fit ce

France, en l'année 1633. 195

cri public par les cabanes qu'on n'é-
barquaſt aucun François ſi on ne le
vouloit mettre en danger euident de
ſa vie. Ayant ouy ce cry, & le Pere
Brebeuf qui l'eſcoutoit m'ayant in-
terpreté ce qu'il vouloit dire, ie m'en
allay avec le Pere de Nouë au fort,
pour en donner aduis au Sieur de
Champlain. Nous eſtions couchez
dans le magazin des François, à l'en-
tour duquel eſtoyēt cabanez les Sau-
uages. Le Fort nous fut ouuert, & a-
pres auoir déclaré le ſubiet de noſtre
venue pendant la nuit, nous retour-
naſmes d'où nous eſtiōs partis: nous
trouuâmes en chemin les Capitaines
des Sauuages en conſeil, auxquels le
Truchement, ſelon que le Sieur de
Champlain luy auoit commandé,
declara qu'on leur vouloit parler en-
cor vne fois deuant leur depart. Le
lendemain au point du iour vn Sau-
uage alla faire vne autre crieé par les

cabanes, disant qu'on ne partiroit point encore ce iour là, & que la ieu- nesse se tint en paix, & que ceux qui n'auoyent pas traité toutes leurs marchandises, la traittassent. Sur les huit ou neuf heures du matin, le sieur de Champlain assembla de re- chef les Capitaines des Hurons, le Sauvage de l'Isle qui auoit faict ce cri publicq, & le Capitaine des Montagnais. Il demanda à ce Sauvage pourquoy il auoit fait cette deffence: il repartit que tout le pais estoit en alarme, & qu'il s'alloit perdre si on embarquoit des François pour les conduire aux Hurons; car les parents du prisonnier ne manqueroiét d'en tuer quelqu'un, & que là dessus la guerre seroit declarée. Que les Hurons mesmes seroient de la partie, car voulans defendre les François, on s'en prendroit à eux; & qu'ainsi tout le pais seroit perdu. Qu'il n'a-

uoit point fait de defence, mais donné aduis de la meschante volonté qu'auoient les parents del'homicide: que si on deliuroit le prisonnier que tous ces troubles tomberoient d'eux mesme, & que la riuere & tout le pais seroit libre. On demanda aux Hurons s'ils ne persistoient pas dans la volonté de nous conduire en leur pais, ils respondirent que la riuere n'estoit pas à eux, & qu'on prit garde avec ces autres nations s'ils pourroient passer en assurance: que pour eux ils ne demandoient pas mieux que d'embarquer des François. Je remarquay la prudence de ces Sauuages, car ils tesmoignerent tellement l'affectiō qu'ils nous portoient qu'ils ne vouloient point choquer les nations par lesquelles ils doiuent passer venans à Kebec: l'un d'eux s'adressant à ce Sauuage del'Isle luy dit, preste l'oreille maintenant, ne dy

point quand nous ferons là hault en ton pays, que nous n'auons point parlé pour le prisonnier, nous auons fait ce que nous auons peu : mais que veux tu que nous disions aux raisons du sieur de Champlain ? Les François nous sont amis à tous, s'il ne tenoit qu'à nous nous les embarquerions. Il faut confesser que les Hurons monstroient grande inclination de mener nos Peres. Le sieur de Champlain voyant ce changement si subit fit tout ce qu'il peut, & nous donna liberté de proposer toutes les raisons que no⁹ pourriôs pour faire en sorte que nos peres se peussent mettre en chemin: il apporta des raisons tres-fortes, & tres-pertinentes. Il se seruit de menace. Il leur proposa la paix, & la guerre, bref on ne pouuoit rien souhaitter dauantage. A tout cela ce Sauuage repartit qu'on ne pouuoit pas tenir la ieunesse, & qu'il

donoit aduis de leur mauuais dessein,
& qu'on attendit pour cette année,
qu'ils dechargeroient leur cholere
contre les Hiroquois leurs ennemis,
& qu'à lors la riuere seroit libre. Ne
vous en prenés point à nous, disoit il,
s'il arriue quelque mal-heur : car
nous n'y scaurions donner ordre. Là
dessus pour gagner ce Sauuage ie de-
mande la grace du prisonnier ayant
au prealable conuenu avec le sieur
de Champlain, lequel me repartit
qu'il y alloit de sa vie, & que nostre
grand Roy luy demanderoit conte
de cet homme qu'on auoit tué : ie
le prie donc de sursoir l'execution
de sa mort iusques à ce qu'on eut
parlé au Roy pour sçauoir sa volôté.
Et là dessus poursuiuant ma pointe,
ie m'adresse aux Sauuages, leur fai-
sant paroistre l'affection que nous
auions pour eux. Que nous ne pour-
suiuions iamais la mort de personne.

que nous taschions de mettre la paix par tout. Le Sieur de Champlain ad-ioustoit des merueilles de son costé, disant que nous parlions à Dieu, que nous estions aimez de ceux qui nous cognoissoyēt, qu'il n'en vouloit poit d'autres tēmoins que les Hurons mesmes qui nous auoyent tant cheris: que nous allions pour leur enseigner de grandes choses. Les Hurons repartirent que cela alloit bien, & que nous auions proposé vn bon expediēt de retarder la mort de ce Sauuage iusques à ce que nous eussions des nouuelles de nostre grand Roy. Je presse donc ce Sauuage de l'Isle, sçauoir mon si les parents de ce prisonnier sçachans que nous plaidions pour luy, ne nous laisseroient pas passer s'ils nous rencontroyent? Que veux tu que ie te die? respondit-il, ils sont enragez: si le prisonnier ne sort il n'y a point d'assurance. Ils ne par-

donneront à personne. Là dessus le Truchement repartit : S'ils font les diables, nous les ferons aussi. En vn mot le Sieur de Champlain les intimida, & leur dict qu'ils se donnassent garde eux-mesmes : & si vn Sauvage estoit apperceu avec des armes, qu'il donneroit permission à ses gens de le tirer & de le mettre à mort, & qu'ils l'auoyent menacé luy-mesme à cause qu'il va seul : mais que d'orenauant il ne marcheroit plus en enfant, mais en soldat. Je suis amy de tous, vous estes mes amis, disoit-il aux Hurons, ie vous chersis, i'ay mis ma vie pour vous, ie la mettray encore : ie vous protegeray, mais ie suis ennemy des meschans.

On dira que le Capitaine de la nation de ce meurtrier se deburoit saisir de ceux qui ont mauuaise volonté contre les François. il est vray, mais i'ay desia remarqué cy dessus que ces

Sauuages n'ont aucune police, & que leur Capitaine n'a point cette autorité. Ce qu'il peut faire, c'est de prier ces meschans de se diuertir de leurs desseins, voire mesme il est arriué autrefois que les Sauuages craignans plus les Europeans qu'ils ne les craignent maintenant, si quelqu'un de leurs hommes auoit quelque volonté de tuer vn François, soit qu'il eut songé qu'il le debuoit faire, ou autrement, les autres le flattoient, & luy faisoient des presens de peur qu'il n'executast son mauuais dessein, & qu'il ne perdist par ce moyen tout le pais. Maintenant c'est beaucoup qu'ils aduertissent les François qu'ils se tiennent sur leurs gardes, comme ils ont fait n'a pas long temps, disans qu'il y auoit quelques ieunes hommes qui espioient dans les bois s'ils trouueroient quelque François à l'escart pour l'assommer, & ainsi on

n'est point en assurance parmy ces peuples, disons neantmoins, *Qui habitat in adiutorio Altissimi, in protectione Dei cæli commorabitur.*

Mais concluons ce conseil. Le Pere Brebeuf voiant que s^{on} voyage estoit rompu, & que ce feroit temerité de l'entreprendre non pour la crainte de la mort, car ie ne les vy iamais, si resolus luy, & ses deux cōpagnons le Pere Daniel, & le Pere Dauost qu'alors qu'on parla qu'ils pourroient laisser la vie au chemin qu'ils entreprenoient pour la gloire de nostre Seigneur : mais comme ils engageoient les François à vne guerre contre ces peuples au cas qu'on les mit à mort, nous iugeasmes avec l'aduis du sieur de Champlain que la conseruation de la paix entre ces nations estoit preferable à la consolation qu'ils auroient de mourir en telle occasion. Le Pere Brebeuf voyant

donc ce passage fermé pour cette année, apostropha les Hurons, & leur dit: Vous estes nos freres, nous voulions aller en vostre pais pour viure & mourir avec vous: mais, puisque la riuere est bouchée, nous attendrons à l'année qui vient que tout sera paisible. C'est vous qui ferés la plus grande perte, car maintenant que ie commence à vous pouuoir parler sans truchement ie voulois vous enseigner le chemin du ciel, & vous decouurir les grandes richesses de l'autre vie; mais ce mal-heur vous priue de tous ces biens. Ils repartirent qu'ils en estoient bien marries, & qu'une année seroit bien tost passée.

A l'issue de cette assemblée nous nous en allasmes par les cabanes retirer le petit bagage de nos Peres que nous auions desia mis entre les mains des Sauvages pour le porter en leur

païs. Ces pauvres gens estoient bien faschez de cet accident, & quelques-uns du village de la Rochelle dirent au Pere que s'il vouloit venir, qu'ils l'embarqueroient, & qu'ils esperoyent le pouuoir faire passer : mais c'estoit se mettre luy & eux & les François en danger. Voila donc l'esperance d'entrer aux Hurons perdue pour cette année. Je prie Dieu qu'il nous ouvre la porte l'an prochain. Voicy deux raisons plus fortes que deux grosses ferrures qui semblent l'auoir fermée pour vn long temps.

La premiere est tirée de l'intérest des Sauvages de l'Isle, des Algonquais, & des autres nations qui sont entre Kebec & les Hurons. Ces peuples voudroyent bien que les Hurons ne descendissent point aux François pour traitter leurs pelleteries, afin de remporter tout le gain de la traite, desirans eux-mesmes aller recueillir les

marchandises des peuples circonuofins pour les apporter aux François: c'est pourquoy ils ne font pas bien aises que nous allions aux Hurons, s'imaginans qu'on les follicite de defcendre, & que les François eftans avec eux on ne fçauroit fi aifémēt leur fermer le paffage. La feconde raifon eft tirée de la crainte des Hurons: ils voyent que les François ne veulent point receuoir de prefés pour la mort de leurs hommes quand on en a tué quelqu'un: ils craignent que leur ieunefse ne faffe quelque mauuais coup, car ils feroient obligez d'amener vif ou mort celuy qui auroit cōmis quelque meurtre, ou bien de rompre avec les François. Cela les tient en ceruelle, d'ailleurs, le fleur de Champlain leur tefmoignant qu'il n'y a point de vraye amitié fi on ne s'entreuifite les vns les autres: ils defirēt grandemēt, du moins en apparece, de nous auoir

en leur païs. Dieu a placé des limites dans les temps, qu'on ne scauroit outrepasser: quand le moment sera arriué auquel il a delibéré de donner secours à ces nations, il n'y a digue ny barriere qui puisse resister à sa puissance.

Au reste cōme ie ne cognois point les secrets ressorts de sa prouidence, ie n'ay peu encor iusques à present m'attrister de ce retardement de nos Peres. Autant que nous pouuons coniecturer par les apparences humaines il y auoit esperance d'une grande moisson: mais ayant fait tout ce que nous auons peu pour enuoier des ouuriers à cette recolte, nous croyons que le maistre du champ n'a pas voulu qu'on y mist encore la faucille: si ce coup est vn coup de sa bonté, qui void au delà de nos pensées, qu'il soit beny pour vn iamais: si c'est vn coup de sa iustice qui ait voulu

chastier si rigoureusement nos offenses, qu'il soit encor beny au delà des temps. Nous detestons la cause de ce chastiment, & adorons la main qui nous frappe, avec vne tres-grande confiance que celuy qui a tiré la lumiere des tenebres, tirera du bien de ce malheur. Nos Peres ne serót point icy oisifs. Le Pere Brebeuf leur fera leçon tous les iours soirs & matins de la langue des Hurons. Je me sens moy-mesme fort porté d'aller à cette eschole, afin que si V. Reuer. me veut enuoyer l'an qui vient avec eux i'aye desia quelque auance: ie n'ay encor rien côclud d'assuré sur ce point: i'y veux pèser pl⁹ à loisir deuât Dieu.

Pour retourner à nos Hurons, Louys Amantacha voyant que nous n'alliós point en son pais, & qu'il s'édeuoit aller le lendemain au poinct du iour, il s'en vint coucher en nôtre petite maison pour se confesser & com-

cōmunier encore vne fois auant son
depart; ce qu'il fit, nous donnāt vne
grande consolation, & le iour suiuant
6. Aoust tous les Hurons trousserent
bagage, & en moins de riē enleuerēt
leurs maisons & leurs richesses, & les
emporterēt avec eux pour s'en seruir
pendant le chemin d'environ 300
lieuës qu'on conte de Kebec en leur
pais. I'entretins quelque tēps Louys
Amātacha, ie le sonday le mieux qu'il
me fut possible; car les Sauuages sont
assez complaisans & dissimulez: ie ne
trouuay rien que de bon en luy, c'est
l'vn des bōs esprits que i'aye veu par-
my ces peuples. V. R. me permettra,
s'il luy plaist, de le recommāder à ses
prieres & à celles de tous nos Peres
& Freres de sa prouince; car si vne
fois l'esprit de Dieu s'empare de cete
ame, ce sera vn puissant secours pour
ceux qui porteront les bonnes nou-
uelles de l'Euāgile en ces contrées, &

au contraire comme il a fréquenté les Anglois, s'il se porte au mal il gastera tout: mais nous auôs pl^r de sujet d'esperer le bié, que de craindre le mal. Il semble d'ailleurs que Dieu vueille ouurir les trefors de sa misericorde à ces pauvres Barbares qui nous souhaitent, du moins à ce qu'il semble avec affection. Je voy vn grand desir en nos Peres de deuorer toutes ces difficultez qui se rencontrent dās l'estude de ces langues, & vous diriez quasi que Dieu les a arrestez pour les acquerir icy plus cōmodement, afin qu'ils puissēt à mesme temps mettre le feu en diuers endroits des Hurons quand sa Maiesté leur y donnera entrée. Je ne crains qu'une chose en ce dilayement, que l'Ancienne Frāce ne se lasse de secourir la Nouvelle voiant que la moisson tarde tant à meurir: mais qu'ò se souuienne que les potirós naissent en vne nuict, & qu'il faut

des années pour meurir les fruiçts de la palme. On a esté 38 ans à ce que y ouy dire, avant que de rien faire au Brasil. Combien a on attendu aux portes de la Chine? Dieu vueille qu'o y soit bié entré de l'heure que ie parle. Ceux qui courent, & qui s'eschauffent si fort se lassent bien souuent plus qu'ils n'auancent. Ie ne dy pas cecy pour reietter bien loing la conuerfion des Sauuages. Si nos Peres fussent entrés cette année aux Hurôs ie m'attendois de rescrire a V. R. l'an prochain que, *receperat Samaria verbum Dei*, que ces barbares auoient receu la foy; ce sera quād il plaira à celuy duquel dépēd ce grād ouurage: car à mō aduis les hōmes y peuuent bien peu, quoy qu'ils n'y doiuent espargner ny leurs traualx, ny leur sãg, ny leur vie. ô qui verroit dans l'vne des grandes ruës de Paris ce que ie voyois il y a trois iours aupres du grand fleuve S.

Laurés cinq ou six cens Hurós vestus à la Sauuage les vns de peaux d'ours, les autres de peaux de castor, & d'autres de peau d'Esplan tous hommes bien faits, d'une riche taille, hauts, puissans d'une bõne paste, d'un corps biéfourny; qui les verroit dy ie d'emádans secours, & proferans les parolles que disoit ce Macedonien à saint Paul *Transiens in Macedoniam adiua nos: Venés, secourés nous, apportés en nostre país le flambeau qui n'y a iamais éclairé! ô que ce spectacle donneroit de cõpassion à ceux qui ont tant soit peu d'amour de celuy qui a versé tout sõ sang pour ces ames qui se perdent tous les iours faute que personne ne le recueille pour leur appliquer.*

Mais il est tantost temps de m'aui-
ser que ie n'escry plus vne lettre, mais
vn liure, tant ie suis long: ce n'estoit
pas mõi dessein de tãt escrire, les feuil-
lers se sont multipliés insensiblement,

& m'ont mis en tel point qu'il fault
que i'enuoie ce brouillard pour ne
pouuoir tirer & mettre au net ce que
ie croirois debuoir estre présenté à
V. R. I'escriray vne autre fois plus
precisemēt & plus asseuremēt. On se
fie beaucoup en ces premiers cōmē-
cemens, cōme i'ay dit, au rapport de
ceux qu'on croid auoir prattiqué les
Sauuages. *P'us valet oculatus testis quàm
decem auriti.* I'ay remarqué qu'apres a-
uoir veu quelque action commune à
deux ou trois Sauuages, on l'attribue
incontinent à toute la Nation: L'ar-
gument qui se fait du denombrement
des parties est fautif s'il ne les com-
préd toutes ou la plus grande partie.
Aioustés qu'il y a quantité de peuples
en ces contrées qui conuiennent en
plusieurs choses, & differēt en beau-
coup d'autres; si bien quād on dit que
les Sauuages ont coustume de faire
quelque action, cela peut estre vray

d'une nation, & non pas de l'autre:
Le temps est le pere de la verité.

C'est assez pour cette année: mille & mille actions de graces des soins & de la charité de V. R. en nôtre endroit & à l'endroit de tant de pauvres peuples qu'elle oblige nous faisât icy subsister; car quoy que nous faisiôs peu, si est ce que j'espere que nous donnerôs commencement à ceux qui viendrôt apres nous, & qui feront beaucoup. Nous sômes tous en bonne santé par la grace de nost. Seigneur, & suppliôs V. R. d'un mesme cœur de nous enuoier des personnes capables d'apprendre les langues. C'est ce que ie voy maintenant de plus nécessaire pour le bié des ames en ces pays. Pour la terre, ie luy en enuoie des fructs, ce sont des espics de formét, de seigle & d'orge, que nous auôs semé pres de nôtre maisonnette. Nous ramassâmes l'an passé quelques touffes de seigle que

nous trouuions çà & là parmy des
pois : ie contay en quelquesvnes 60
^{grains} épics, en d'autres 80, en d'autres 112.
Nous battismes ces glannes, & en ti-
râmes vn peu de seigle, qui nous paie-
ra bié cette année la peine qu'il nous
donna de le glâner l'an passé. Le peu
de fourmēt que nous auons semé de-
uant les neiges est fort beau, celuy
qu'on a semé au printemps ne meuri-
ra point, car c'est du bled d'hyuer : il
faudroit auoir du bled marsais & du
bled sans barbe, on dit qu'il est meil-
leur. L'orge est plus beau qu'en Frâ-
ce : & ie ne doute point que si le pays
estoit découuert qu'on ne rencôtrast
des vallées tres fertiles. Les bois sont
malings ils nourrissent les froids en-
gendrent les petites gelées produi-
sent quantité de vermines, cōme des
sauterelles, des vers, des pucerós qui
mangent notamment le iardinage.
nous nous esloignerons d'eux petit à

petit sâs toutefois bouger d'une place. Je r'entre en discours contre ma pensée, quittons tout pour nous recomander aux prieres, & Saints Sacrifices de V. R. & de toute sa province. Je croy que cette missiô est bié auât dâs son cœur, & que ces pauvres Sauvages y ont bône place. celui là y est aussi avec eux qui est en verité

D. V. R.


Tres-obligé & tres-obeissant seruiteur selon
Dieu P A V L L E I E V N E

Extrait du Priuilege au Roy

PAR Grace & Priuilege du Roy il est permis à Sebastien Cramoisy, marchand Libraire luré en l'Vniuersité de Paris d'imprimer ou faire imprimer vn liure intitulé *Relation de ce qui s'est passé en la Nouvelle France en l'année mil six cens trente trois, Enuoyé au R^p Barthelemy laquisnot Prouincial de la Compagnie de Iesus en la prouince de France, Par le Pere Paul le Ieuue de la meisme Compagnie; Superieur de la Residence de Kebek*. & ce pendant le temps & espace de cinq années cōsecutives. Aucc defenses à tous Libraires & Imprimeurs d'imprimer, ou faire imprimer ledit liure, souz pretexte de desguisement, ou changement qu'ils y pourroyent faire, à peine de confiscation, & de l'amende portée par ledit Priuilege. Donnée à Saint Germain en Laye le 10 Decembre, mil six cens trente trois.

Par le Roy en son conseil.

Poicteuin.



EA634

LS34r1

C



